

# Akipi Nu Duc Ejaas Kolomunitos Katiida

Jeffersonville, Indiana, U.S.A.

61-0723M

1 Epol oni aiyalama atupuruc kana kanuka ajakut naka Ejakait Edeke, ebe kigeuni oni aijaanakin sek koipone kalo ainakin aisiraret, ebe-ebe ibuni oni "akiirar, abilakin" akonyeneKe, ebe ejaatar Ngesi ibore yenilimomkina oni. Ajeni eong ejok ebe ebuni Ngesi aswam ngun nuesumunit Ngesi. Ericit duc Ngesi Akirotoke. Aso kiyalama oni noi atukokin nepepe, ajarete, ido kosiep kalo loka aijar namam edaun, ido apedoritos aima Ejakait bobo, ido atukokin nepepe kasodete airar kamaKeng. Ngin nges apolou nakitukokinor oni nepepe, erai kanuka apolou kangipekangin.

2 Kwana, abu eong bala abelakin mama ejai Onac Neville, komam apeleikinit, lolo, kanuka arujasit na abu eong kadum. Na...eyuunit eong ebe kotoma...eong...kotoma airujasia. Eyuunit eong ebe kiswamanaros edeke kede itunga kotoma airujasia. Ido abu eong adum arujasit naetegelikina noi, akuar napak kaya. Ebe, ajai eong etorit osiep loka emoru, osiep loimoru ece, alosi aiboisit naenyamere neabeitor eong adumun ikanyamat-ikanyamat lukatibong. Kasodi eong amisiikin ebe, napekayapiari eong aiboisit ngin, ajaas kesi abolia emusik, aramete aramak emusik, kede arigirigin, kisialete itunga napekejaas ainyam. Ido ajai icebore yenekamunit ngun yenimam abu kominak eong, aso abu eong enac ibore ngin. Kasodi eong airiamun kede icetunganan yenabuni komoru aiboisitike nakainyam. Konye abu eong bala ekunya awai kamakec, abongor kau nako teten, arai, kediany.

3 Ido nepetai, kwap kotoma aditot, apedori eong asesen ekanisa. Abu eong apup eporoto loka icetunganan, ebala, kiriamunos kede Onac Branham airiamet ace-ace naka irotin. Ejai adokun kwap, kokuju na emoru kangina. Ido kolimok nges ibore yen." Kasodi eong aiwonyar kanu adolokin airiamet.

Ido neadokuna itunganan, arai Onac Neviile konapite esuutike loarengan kosubite kwape kejaar kanen atupuruc na. ido kotema ngesi ebe, "Onac Branham, arai ilosi ijo oibuga," ebala ebe, "Ti erai ibore yen- yenejok ijo adokun kwap, naarai Onac Hank..." kwana, nges bon ediopet loajeni eong, Onac Hank, nges Onac Henry Carlson, kinyarai isio nges ebe Hank, ebala ebe, "Aticepak ebuni aoomoom ebe Erai ibore yenitegelikina ebe mam bobo ijo kipejonokini ekanisa arai ilosi ijo ajaut Otaun, arai oibuga adaun apaarasia adis." Akwenyuni eong.

Ido kanukangun, abu eong apup bala epone loitegelikina. Mam eong akoto abelar kotoma apak ka ngin naka esabiiti, kiton neabu eong elipia Onac Neville arai ajaatar ngesi icebore yenetegelikina atupuruc na kanuka ekanisa. Aso abu ngesi kosianar, kwape duc ebalare, ebala ebe, "Kobia kwap." Aso, apote do isio. Abu eong eitok ainomakin nges esimu ibian paaran, ido abuni eong atupuruc, koipone kalo mam idio kaoni kere kijenia.

4 Kwana eyuunit ebe ti erai ibore yenejok, nasodit, kanu eong ber aitetemikin yes icebore. Arai eong, loeomitai ebe, etiono amisiikin mama ejaas itunga luipu. Ido arai eong loetiono amisiikin mamaka da, elopet. Naarai, atamit eong atupit aingarenikini naka Emoyo Lokalaunan, cut kapedora eong kere. Ido ngun nges einakit oni kitegelikina, itei jo. Kiswamai oni iboro lu oni-kiinakinete oni aboikin kwap ido aumokin icesawan, "Inyobo ainakini eong aswam ibore kaingin? Ekonakini ber eswamai ibore kangin?" Ido kanepenganen koomite ijo aticepak ebe kiswama ijo cut nuebusakinit ijo aswam. Konye arai bon kibuni ijo atitingor, kosodi ajaun kede aiyuun, ido omisiikite ijo ejok ebe kingarenikit ijo Edeke aswam ngun, ibuni ijo adumun ebe kiswamasi cut ejok. Kiany? Ido kirwan nuipu kidumuni oni ngun. Ido ajeni eong Onac Neville da edumunitor ngun, kirwan nuipu. Ido ingarenok ka itunga luka Emoyo emisiikinete ngun.

Ayangaiki apak kotoma aijaraka ebe...Kaitebeikin, anyoun nearokor eong arai etelepat, mam eong apupunitor aingarenikinio aiboi kotoma -kotoma Jeffersonville. Erai lem ationis naepol, eong atamakin aiboi kane. Nasodit ber ekuse loikwamin mam ecamanara kede eong erono noi. Icebore, esubit bala ejai aicikakinio naka emoyo.

5 kibongo ijo kosodi asesen nenice kane, arai mam abu komudiar kotoma apaaran naka akalele, ejai ebalua loikamunit ngun, ebe, abu eong, nasodit anyaraunitai eong toma aijaanakin, ageuni eong ajalakin. Kosodi Onac George DeArk ido eong...

Ido totoke Onac Graham Snelling, Onac Hawkins loejaatar aiboisit naemasere akinyet ko New Albany, ka itunga luipu, apotu kiriamunos ka eong kinga naka iboisit yenididi yenairiamunun kalaije. Ido kobalas da ebe, korai eong apedori aiboi kangina, ti kes eyangautu ikecedwe omeesa, kanu-kanu adukuna eyekalu, tetere mam kes irimete anyoun aiboisit kiton aibosit.

6 Nakeirara eong toto ngin nadidi, edakit ikoku idiopet akanike ido idiopet yenice kede akan ace, atemar ebe ekapakina ngesi ainakin ikedwe komeesa, kanuka adukio aiboisit nepote kesi ajaun aima, arai ngin naapol noi nationikit eong atitingikin. Aso abu Onac George kede eong nepepe kacamnanaros ebe ibuni isio asalakin kasodete adukun eyekalu.

Ido nakedukunere aiduk eyekalu, asubit duc...Atupuruc na esirerengio eong eyekalu, abu atapoet kobu, naiwadikatai ido kotoma amoru nagor kangina, nabu Emoyo Lokalaunan kolimokina eong ebe, "Mam loerai eyekalukon." Kiany? Kasodi eong aingit nejai eyekaluka kosodi Ngesi aisiboikin eong kwap naka akuj

naecai nabululu. Kosodi do Ngesi atemar ebe, "Kiswama aswam naka ekalimonokinan," kaceda, kwape kijenatar yesi. Iwadikatai kiton otaabon da.

7 Iboro ngul kere imorikikitai. Ido apaaran adiopet naekasia eong alaaro kangina kane iboio Onac Wood kwana, ido eboie amuranika naberu kangina apaarasia ngun; eboie eong adoketait naka okau, adoketait naka esimit, ebe adukit eong iboisit yenididi yen kangina kanuka amuranika naberu ido asubit ngesi bala nakedaran ekanisa apak kangin. Kidarite nges. Ido ocai cut kwape kepedoria nginitunganan kere einer, abu eporoto kenerata kaong, kobala ebe, "Eebe mam eong esirerengi ijo bon ebe iboie ijo kane. Ekoto ijo atiakar kama ejaas itungakon ka aiboisit na." Eebo, eong, abu ngin epirisa eong cut adaun bala esabiiti arai adepar da.

8 Kainyikokit, isawan kere, ekwenyana eong icebore ebe, "Kolot awai, kolot awai. Kolot owai lo oto. Kinyikok alosit owai lo to." Eebo, eong...Etapasenen duc eong. Ido esubit bala nginisawa...

Kwana, abu eong etacau ngin kotoma aijeneka ebe esabiiti lo abuni eong aporor Tucson, nebeitor eong apagisa aiboisit, ajaun ngina akamu na; aibwaikin idwe osomero, ageun olap loikanyet kaongon. Ajai eong aiboisit. Ajai aiboisit naaponi ainakin eong kangina. Konye ejai ibore yenabu...Ido-ido arai anyou eong...

9 iIbore ice yenakoto eong alimun. Nape eroko eong eduko ekai lo ne, eyapiesi loka ekalimonokinan, nejai kwana, mam eong akoto aiduk ngina. Amojongit totoke akaberu. Ido abu ber komony da kanukangun, kobala ebe, "Mam cut eong apedori ajalakin toto kane, ajeni ebe emojongit ngesi, ido aticepak mam nges eponio aidar ejok." Eebo, abu eong amisiik ngun. Amisiikit eong. Totoke ngin ido toto adiopet bon naejaatar ngesi, arai adiopetebon naebuni ngesi ajaunor. Aso, abu eong amisiik ngun. Aso eong-abu eong elip mama ejai Ejakait, katema, "Ejakait kamam aiboisit eminakinitor eong," katema, koinak eong aisimonikin. Abuni eong alosit adioboisit na ikoto ijo eong alosit, kanenice kere. Konye mam eong akoto aitakadikin akaberu, alemar nges kane, kiton akwap naegelara nemam nges ejenia idiotunganan. Kosodi do amamei eong isawan kere, nepetai. Koinakinai eong aisimonikin ajaun ne kede nges."

Ido kwana, neayangarer totoke, ido a lot nges ngina toma aibuses, obonguni bobo eipud, itei jo, kwana alosit ngaren. Mam eong ajeni nuswama.

10 Ido apaaran ya neabunio aisianakin na ageunitos inacat airimoria, abu eong abwo olutaari apak ya ajai eong ne ido abu eong alimok yes ebe mam eong abuni ajaut osawe bon ebe ajai ngin alosit ngaren. Aso apotu inacan ka asianut kitetenaas ngun ejok. Abu kere kocau cut. Kotoma osawan akaisarei ka luongon, eriamit ngin.

Kwana, epukori ngin do bobo esawe kanuka. Mam eong ajeni nuebeit aswam. Mam eong ajeni erot loebeit aitor. Elip eong Edeke aitapoet. Engit eong nges alimokin eong nuswama. Konye ainaki Ngesi eong aboi.

11 Kwana, akuar ya nealemara eong idwe ludidik kere awai, akaberu ka kere, kokai, abu eong ainakin mama ejai Ejakait Edeke. Kasodi alimokin Ejakait Edeke ebe, "Arai kisirereng Ijo eong orotoka loalosi eong, abuni eong aijaanakin Ijo. Konye ejaun ber Ijo aitodikin eong neloton, ka nuswaman." Aso abu eong ainakin mama ejai Ejakait. Kede-kede aijaanakin kere, abu eong ainakin mama ejai Ejakait. Kasodi eong atemar ebe, "Kere nuipukori Ijo, kere nuiswamai ijo, abuni eong alosit korot kangol. Kiton neiswamauna ijo erot, abuni eong anyikokin kwape kajaar eong kiton Ijo aismamaun erot." Kasodi eong ailip Nges aitacaun ngin ejok tetere mam eong engalangalaun, naarai eyuunit eong abeit ebe ijai oni asisiarin nuka irotin kanu icebore aismamaun.

Apupunit eong ngin edwario atupuruc na kane ejai Onac Neville, arai abu koinak ngin neabu eong ajenuna-neabu eong ajenuna ebe arai adwarasit adodiarit apeleikinit ngesi. Kwana, kanukangun, elipak eong yes kere, ido epuda eong yes kere alip kanukang, tetere Emoyo Lokalaunan ingarenikini eong cut neibusakinit eong alosit, nuibusakinit eong alosit aswam, tetere mam eong eswamauni aibucaret.

12 Itei ijo, kirwan nuipu, eomitos itunga ebe, ainakinet naka aidwar, etemari Edeke atemar ebe, "Abuni Eong alemun ijo, cut kane kasodi aisiboikin ijo kwap ne. kwana ilosi ijo cut kane." Ido mam Nges elimokini ijo iboro ngul kere, arai kiswama ngun, aiyuun bodo naka aipikor naepone ali abu ijo kojaatar? Kiany? Itei ijo, ijo, Einakini ngesi ijo aibwo bon adepar idiotunganan kere. Kiany? Kipedorete yesi kere abunore mamaka kosodete ailip eong iceboro, mam Nges ekurwokitor konye inyo ejai Ngesi ainakin ijo abongokinet. Abeit ngin. Eebo. Konye apedori eong alip Nges iboro eong elopet, ido kirwan nuipu ejalakini Ngesi eong bon, itei ijo, ajalakin eong alosit ngaren kasodi alomar toma kangin.

Ejaas eong iboro luebeit eong atemonokin eong elopet, kede nuebeit eong aitutub. Ido erai na naepol noi, kiton nemam eong apedora aismamaun ngin kiton nemonikinor eong ebe erai Nges kineras ka eong. Ido eong-eong...Mam Ngesi einakini eong aitapoet. Ejalakini Ngesi eong bon. Aso eboie do eong kwape ekoki, bala, atupuruc na, eong-mam eong erot loebeit aitor. Aso, etitingik eong Ejakait.

13 Abu eong- abu eong apup kwape sek, kotoma airuja ngin, ekoto eong abongun ne oyekalu kasodi aingarakin onac Neville kiton icebore aiswamaun kotoma korot. Aso abuni eong ajaun orot.

Abu eong engit Onac Neville ipak edit kau ebe, "Epone bo ali elosio ekanisa?"

Kosodi ngesi atemar ebe, "Ejok."

Aso apupi eong ebe iroko yesi kijaas kede ainakineta nuka Emoyo akidingosikus, nuiswamaete, ainakineta nuka aidwar, ka-ka einer kede angajepa, ka aijul angajepa, napotu oni eiraas apak edit kau. Ido iboro ngul isinyikokitos ekanisa, ido epolok noi.

14 Konye abu eong aomite ebe, aticepak akuar na amina eong arai Onac Neville... Arai mam Emoyo Lokalaunan ingarenikini oni nejai icebore yenitegelikina, akuar na akoto eong ajaun kede e... Yes kere, eroko yes enyouna atupuruc na, aiwadik aingiseta kosodete aibwaikin ne, adiongiset kotoma aijen kon, tetere oni kijenuni nueomit ekanisa. Epone ngol ebeitor icokok aswam kanu ajenu nuejaas otauon luka itunga. Ido kanginidiopet kayesi yenejaas kede aingiset, iwadik kosodi agwaikin ne. arai imameotor ijo apapula na-naiwadikaikina atupuruc na, iwadik do akuar na sek. Aso akoto eong ajaun kede apak naepol cut kwape kapedora eong, kotoma kangun, airere kes ka abongonokin yes kwape kiwadikaterere

15 Ido arai ekoto Edeke, arai erai ngin akote naka Edeke; alimunitor eong akirot kane apak namam ewoja kau, ebe akoto eong einer kede yes nuikamunitos apuceta akanyaakaarei nuka-nuka apukokinio. Kwana arai oni...Mam eong apedori adolokin aitor aipuceta ngun ekar lo kere, eyangaikini ageun osula loka okanyetkaape loka apukokinio, kiton lo-kitoni loitomonetakany kaongon, kanu aitor toma aipuceta ngun. Konye nusodit auni arai aongon kakesi epedorete abongonokinio kotoma akuar adiopet, aomit nginipucet erai akuar.

16 Kwana, arai kimisiik oni, kaanyun neibwouna oni koitaabo loka Apukokinio, neaponi koyangarere ekanisa toma aibuses, ido nuce kere erai aiswamanar kede ateker naka iyudayan. Kanukangun ejai do oni aigwerun kwap, kotoma aurupoorio naka ekanisa, kasodete ayangar...kiseseni ijo kane nuiswamaunos kotoma aipuceta kangun, ka apak naka Ekanisa loka Imo. Odaunite akanisa alosit; ido kede ateker naka Isirael, ebonguni cut ainyakun Isirael kiton aiboistike agear napekenyouna alosit kede kes, kiton apak nakatinen kwana; ido abongun naka Mesia, nekijaunatar kesi Mesia.

Kwana, kimisiik ijo ngin? Adaun ayangar ekanisa kuju. Edeke egei ber aiswamanar kede ekanisa, aturio nuka Ekanisa. Apotu oni ayangasi ngun. Koyangarete do ekanisa kuju toma aibuses. Obongori do Emoyo Lokalaunan kosodi adumun Isirael, kwape ateker. Kosodi ayangaun ngin cut kiton ne, olosi edukone loka Imerekek ngaren, kosodi do ainyakun kes kau bobo kotoma osange loka apak kangin. Abuni eong aitobwo akabao naka okau, kasodi apedori ainomun ngin kasodi aisisianakin ngin, edolu apak. Obonguni Ejakait kede ateran, ido koseseni Isirael ngin. Ido, oo, ikanakini bo apak ngin ai!

17 Kwana, eroko ber oni iyenikina nu toma ejok, ejai akirot naerai aituguikonet nejaas luisiomitos akiro nuka ediini ka luipu, ka ikesisianakinak anatar aturio kere ka itunga luka okanisa loka Kristo ka ngul loeponitos airar nu, ngesi, asabaton akasakanyarei nuka Daniel. Kijaatar oni...Mam oni kipedori alosit nelwana kotoma apukokinio kiton neiyenikina oni Ateran kede Isirael nepepe kede asabaton akaisakanyaakaarei nuka Daniel. Ido, aticepak, arai ekotor Edeke, tetere ebe arai kinakinos Ngesi kede eong koingaren, einer nuikamunitos asabaton nu akaisakanyaakaarei...arai, mere asabaton akaisakanyaakaarei, konye apuceta akanyaakaarei nukawasia. Asabiiti naetupakini, abuni eong aitam ating asabaton akanyaakaarei nuka Daniel, asabaato naitupakin ngin, arai itojok Ejakait, kosodete do apukor alaaro, arai kingarenik Ngesi oni, kanuka ategear, Eebo ibuni do oni ageun kanen.

18 Kibuni eong kede Onac Neville aswam nepepe kotoma kanu, kasodete aswam idiobore kere yenipedori isio aswam kanuka ajokis naka itunga.

Kwana, abongonor kau nginipak, kailip kanuka luedekas, kiyalama duc isio aswam ngun. Ido aticepak abuni eong aswam ngun kotoma kanginiriamun, arai edekaasi itunga, alipanakin kes.

Mam bobo eong epuda aiyatakinit ajaut kede amisiikin aomisio. Itei jo, nuapotu kismamaunos nges nuta. Atam eong. Ido ajeni eong ebe eswamainen eong iboro lueroko; konye atam eong ajara kosiep loka Edeke cut, apak kere, mama ejai Edeke koipone kangol nges ejaunonotor atapoeta nu, nges eswamaunonotor. Karaida itunga lueolionorete iboro kosodete ainomakin eong esimu, ailipit eong alosit ailip mama ejai Ejakait, aingitun nejaas iboro ngun. Kwape kabu Inyubut yenikeka Jesse kooliora, kosodete isap alosit amoun enabi, kosodi alimokin kes ebe adaunit Inyubut abongor ore. Kaceda kwangin, erai ngin cut naedolit noi. Konye adoloki napolror ngin noi, itunga luipu...Mere itunga lukane bon, erai akwap kere, itei jo. Einakinit ngin eong araut etunganan, loegurwokina, kasodi aridakinit yes isawan kere, kiton neadolokina adoketai na...

19 Ido ngun nges ainakini inacan itegearete asisianakin ngin, ebe arai eong Ejakait Yesu Kristo enapit akuan. Ido kijeni oni ebe ti ngin enyilinyila aijaanakin kere cut, kosodi ayangaun amorosit nejai Ekiror loka Kristo ka nginibore kere. Kiany? Aso ngin nges apolou nabu koyangaikina eong ainakin kes aijangaret

naapol noi, kanu atobwoun ngin katipet noi, ainakin kes ajenunu ebe mam ngin arai naka Edeke, arai naka ajokit. Itei jo? Ido eraas kesi itunga luejokak. Ido abu kitoodu ebe kiuritai itunga ngul kitwan nakiareit kede Emoyo Lokalaunan, naarai, nepekaanyunatar abeit kanuka kanu iwadikaere, kapotu kobongutu mama ejai Edeke, cut, itei jo. Katipet, Aso, etodunit ngin ebe arai ajokit atamit aswam icebore kede itunga ngul; araas kesi kere itunga lueyongitos Edeke, Ikristayon.

20 Ido abu konak luipu kakesi alimokin eong ebe, Branham, kijaar kwana isio kede amuno mamakon adepar kwa lem kijaar isio."

Naarai koany nu, kede ainakinet nakeinakinit eong Edeke, ti eong keswama anyoeka kede ngin? Acakakin akwap akejenea, arai, itunga. Luinyarit oni ebe akwap, mam erai, "Ibore yenejai aiboisio kere" kokinga kane, esirikalet loetiting kaceda kwangin. Apeleikinit eong Ikristayon, eyuunan lokabeit, loerai elibibi lo...Ineera oni nuikamuntos akwap, kilimonokini oni nuikamunitos itunga lueuritai kirwan nakiareit," ngun nges inera oni nukec, ebe akwap. Mere idiotunganan kokinga kangina, yenimunaara ido imodimoduna ebe kijari oni kotoma akwap, naerai-naerai apua tai naka akwap naejai abongor. Enera eong nuikanitos Ikristayon lueurunitai kirwan nakiareit, itunga luraas Ikristayon lukabeit.

21 Edarit eong etunganan asomakin eong bobo kanuka icebore. Abu icetunganan kobu mamaka mere apak naeaja kau kosodi atemar, "Aomisioit ber bon da, na Kristo amuiquin amula kwap, kede akemula, ido ailungulungun elupe kosodi ainyonyoikin akonye icetunganan." ebala ebe, epone loarar ngin narono ido igasiaikite, kanu Ngesi amuiquin, kede akemula nuka akitukuKe! Eipone lomam ngin alaia, aimuikin toma agasia, kosodi ailungulungun elupe kosodi aisutakin akonye nuka eyunganan."

Ido etunganan ngopengol! Aputu opukosi aibunget nakalu elosete nono kokwap kangina kotoma aiboisit, ijeni ijo, atapar naiduere. Ido-ido etunganan ngol ejaatar kede arisiti kanu kangin ikoku yenike kere alosit atapar ngin aidu. Ido nges kede akeberu elosenenete atapar ngin aidu. Kitimoi eong, anacanaka. Konye neiduotor angor ngun kangina, bala akwatat kakesi, arai aarei, nginipaaran; angor, amunaara ngin kere ka iboro, ido angor lolo, ido along kanen akipi kangun, aronis ka agasia ngin kotoma aitukes kes, ilikonorete ngin ka alekunun kinga. Ipuda do eong nges asomakin mamaka, itei jo.

Kotemasi ebe, "Arai-arai Kristo kojari lolo, tikes ikamutu Nges kanuka ibore kangin yenamamus aila."

Dobodo ngun? Ajeni eong ejok ebe ikam ijo nuapeleikinit eong. Elosete cut atapar ngin, ido luipu kakesi kede adekasia, esipilis, egonoria ka nginibore kere, kotoma kangina. Ido alekun, alekun bon akitukukon, kanginibore kere kwangin, ido ailotar koipone kangol. Ido ejena ebe erai ngin naelai?

22 Aso, oo, ikatunga, apak najaria oni kotoma, onac, inac! Erai apak naka abongun naka Ejakait! Ijaatar ekanisa amuno adiopetebon, ido nges abongun naka Ejakait.

Eebo, mam eong apedori aitikokin iboro ngul; emamei eipud. Edaunit Ebaibuli aidwar ebe apote ngun ajaun ne. Mam eong apedori aitobwoun kes. Konye akoto eong ekaporoto kiwadikai toma Akuj, ebe etepegit eong ngin, edolu apak naka etube. Etepegit eong ngin.

Aroko eong eyuunit ebe erai Ebaibuli Akirok naka Edeke. Ekepolou emamei ibore kotoma akwap yenedepori aitepeg ngin, aitobwoun ngin. Konye Ebaibuli lo, erai abeit, erai lo Akirok naka Edeke. Aso kwana etolomikisi aitolomikin iwok-iwokotauon toma osapaali, kasodete adongakin mot mama ejai edoket loka ainapakin loejai aiyangun. Ido-ido ipedori imoi oni atubor nenice, konye emakakinos ber kwana kasodete apupokin eporoto loka Papa lokotoma Akuj kwape kinerakinotor Ngesi kede oni kotoma AkirotoKe, imunokina oni, lolo.

23 Ido akuar na, kwana, itemokini ijo kangin ngiset naijaatar ijo. Kwana, mere icebore yenelosi aimusung icetunganan. Arai kiswama ijo ngun, akepolou erai do ngin...Nasodit, mam do ber eong abongokini ngin, itei jo. Konye ejai ijo icebore arai yenice, ibala ebe, "Eebo, kwana, arai eswama eong icebore, Edeke ebala ebe oni aswam na?" Arai, ijeni jo, ingiseta ngul ludidik kotaukon. Arai, kijaar oni kede anakineta eupas kaoni, Onac Branhan, etolosoto kes koipone kalo, arai koipone kaje? Arai, keswamata anyoeka?" icebore yenedepori eong abongokin ijo kotoma kanu kiwadikaere, itei jo. Iwadikau icebore yenididi. Eyalamikin eong. Ido arai ejai adiopet, abuni eong alemun asisia naka eceipone, kasodi alimonokin mamakon akuar na, arai ekoto Ejakait. Erai nasabiiti, ido ajai eong...

24 Asabiiti ya abu eong ageu kede alosit nejai Onac Cauble. Apupuni eong ekide loka ekanisa kalo eruo, kasodi alosit kuju ka kwap kalaaro. Mam eong apedori atitingikin ngin. Kere nges ngun. Abu eong eira yes, aso eong-eong-ajai eong abunore.

Aso kwana ketuluroto awokokwes kasodete einerakin kede Ekasubaniwok ido kotoma akirot naka ailip. Idiotunganan ejaas kede ailipa naitegelikina? Ikeu ijo akonikanin akeun bon, kotema ebe, "eong..." Kitijenu ngin. Ejeni Edeke nuejaas otaukon. Idarite ijo ailipakon kotoma aomisiokon.

25 Edeke lokalaunan noi, loesubit Akuj ka akwap kanuka Akirok naka akitukukon, kanuka aomisio nuka aijenekon. Kibunit isio akonyenekon, kotoma Kristo Yesu, Ejakait kosi, ainakin ijo aiyalama kosi kanuka

kanu kiswamaik ijo isio kere. Ido kiyalama isio noi mamakon, Ejakait, atupuruc na, ajen nekibwoia isio, aijen aboisit naijai isio toma atupuruc na, ido kotoma akiro nukolo nuka apak, ka ngaren nebunit. Kajenete lolo ebe, kanuka asianut naka Edeke, ebe kilotar isio kotoma aokot nuko Calvary, ebe ikapakina isio, kede aiyuun kotauon kosi, airiamun kede Nges arai kebu lolo. Ti isio kitema ebe, "Eebo, kobia Ejakait Yesu."

Ido kiseseni oni aronis kiyatakit eicul. Kitoni nesubitor bala kiriangirianga akwap kanuka kanu iswamai adiakar. Epone lo ejaar amat, epiki, emeret, ka amujalal, ka, Wuu Edeke, asilianut, ka agasia, ka amodokok naka itunga. Ido epone lo kesi, korai tikopedorete amisiikin, Ejakait! Kiswamaete itunga ngul, luenapete koipone kangol kotoma ogoen kangul lumam itodiaritos ayongit Edeke, kosodete alosit ngina orotin, mam kesi emisiikinitos ebe eraas kesi ikur ka apua, aticepak osabiiti ece edumuni ikur ejaas ainyam akuan ngin naitubusikinit ijo? Kesi mam emisiikinitos ebe ebuni enyede anyamar kes kolosete itauonocek ajaun ngina komamei Edeke ikar lumam edaunos, komamei Kristo, komamei amuno, elumorete toma atiakar naidul, kanuka amudiar kapatan kotoma abonguniKe? Wuu Edeke, koinakinai isio eporoto loka-loka akwenyar, tetere isio ikwenyari nginitau kere kanuka ationis naejaas kesi adolokin.

26 Kojaunos ka isio lolo. Koinakinai isio "Akiro nuka acoa," Kwape abu Solomon apak adiopet kotemara kotoma otaabo loka Ekalimonokinan, ebe iraun oni "Adukok luka acoa," ebe ibuni oni araun "Ecokok luka atukonokin kana." Ido kilipi isio ebe, Ejakait, kwape kimoia isio akiro nulimuna, tetereke eraunos-tetere kesi eraunos lukajokak luiunete etau loejai eipud loepol atupuruc na.

Mam isio kibunit kasodete atukokin kwap naka atunyuru naemwanan na lolo, kanuka aanyunio, konye kibunit isio ne naarai imina isio ijo, ido naarai kipuda isio akiirar kane ijai Jo. Irai Ijo lominat kosi lokiminasio, ido kipuda isio akiirar kamakon. Kiyalama isio noi kanu idau isio apupun. Ebuni ngin aiboi kede isio adaun aojau. Kwana koinakinai isio atutubet naijaatar Ijo kanukosi lolo, kwape kinyikokina aidareunit Ijo. Kilipi isio Kokiror loka Yesu, ido KanuKeng. Amen.

27 Kwana erai...[Inera inac kotoma angajep ace. Koinakini onac ajulunet-Ekewa.]

Kiyalama isio noi kanuka aisinyikoinikineta kangun nuka Emoyo, elimonokinete isio ka aikwenyanar isio asesen Akiro nu aticepak elosi Emoyo Lokalaunan einerakin mamakosi lolo. Ido mam isio ijeni nuejaatar Ngesi kaingadis kanukosi, konye kijeni isio ebe ejai cut idiobore yenelosi Ngesi ayangaun. Aticepak aingiset kotoma aomisiokon, ebe ebuni Ngesi einer kanen. Epodori Ngesi einer ngin lolo kotoma aisiraret, atupuruc na. epedori einer ngin akuar na kotoma aijanakin. Ebuni Ngesi kanenice kotoma apaaran kana lolo, etamit Ngesi, asubit bala, aikwentar icetunganan aikamun akiro.

28 Kwana, kibeloor toma Akirot naiwadikatai, erereosi kotoma otaabo loka Anyoun, kanuka aisia naka kanaesabiiti.

kijaatar yesi aijaanakin naka aibatis? [Kotemari Onac Neville ebe, "Mam, kiton isawan itomon ka luarei atibong na."-Ekewa.] Aijanakin naka aibatisao ejai osawan itomon ka luarei atibong na.

29 Kalototo toma osula loitomonetakany kaarei loka Anyoun, ido ageasi kede e...ekokoro loikanyet, eyuunit eong, ekokoro loikanyet ka loikanyetkaape loka osula loitomonetakany kaarei loka Anyoun.

*Kotema Ejakait Masu atiar, "Kitor akonyen nuka itunga, koyanga nepepe kajo ice komakio luka Isirael; kiting ebelakon kakaninikon, loinomia kolo ijo ecor, kolot.*

*Koany, abwoi eong kakonyenekon komoru Koreb; inomi ijo atiiba, elomunete akipi, komata itunga." Kiswama Musa kwangi kakonyen nuka imoakio lukaIsirael.*

Kwana, korai ti eong anyara na akou naka Akirot naka aisia naedit naka kanaesabiiti, akoto eong aibwaikin na kwape akou naka akirot naka aisia naka atupuruc kana. Akipi nu duc ejaas katiiba.

30 kijeni oni ebe erai duc Isirael aitupuset naakolo sek naka ekanisa. Naarai Isirael araas itunga luka Edeke kiton nealomunata kesi Komisiri, kosodete do araun ekanisa loka Edeke naarai kaponi kotiakunai kesi kama ejaasi akwapin.

Ido nekijaar oni atiakan kama ejaas akwapin, karaunos do oni ekanisa. Konye anyoun nekiweniwenar oni kede akwapin, mam do oni kijai toma okanisa. Amuno eong ebe elumori ngen cut toma, ikama aiboisitike. Itei jo mam oni kirai ekanisa kiton nekitiakunor oni kanejaas akwapin. Atiakun awokowat, alomun kakidingos naka itunga lumam elaete, ido mam aiswamanar kede kes, mam aimorikikin kede akecediakanareta. Aimor ajokot kede lumam kiyuunits, konye kotiakan kama ejaas iboro luka akwap.

Ido neajaar Isirael Misiri, araas kesi itunga luka Edeke. Ido nakenyaraunere kes kinga, arai apotu konyoutu, alomun kinga, konyaraete do kes ebe ekanisa, naarai arai do nen akaulo na kes atiakan kama ejaas akwapin.

31 Ido akirot alopel ebe ekanisa erai ekepolou ebe "Luenyaraunitai kinga." Anyoun "Alomun kinga." Nginidiopet kaoni, kwape Ikristayon, kijaun kede Anyoun kotama ajarawok. Kipou ajaunos kede apak

naponi konyarauner oni kinga kama ejaas ipadicawok, anyaraun kinga kama ejaas itunga lukolo kidicar oni, kasodete araun itunga luitegelikina, aswam kede itunga luitegelikina lueswamaete koipone loitegelikina ido kineras koipone loitegelikina. Arai ngin anyoun kotoma otauonowok.

Einakit Isirael oni atupuset naejok noi, nabu Edeke konyarauna kes kinga. Kapotu kojaunos kede anyoun, kosodete alomun kinga naka itunga luka akwap, kosodete araun akwap natiakuna, mama ejai Edeke, itunga luitegelikina. Kapotu kolosenenete kokwap naka etorube loka ecolong lokaitim. Ajarete ido kolosete kokwap naka epir loka akim loaumokin. Ido koyangau kes Edeke kotoma omisiri, kiton akwap nabu Ngesi kisumunikinite.

32 Ido, kotoma anyoun kana, kaponi kes koinakinai engarenon lokomoyo, engarenon loarai Musa, enabi lokaumokin loenyonyoikinitai loarai e-etunganan lokaumokin. Arai ngesi etunganan loayongit Edeke, eurunitai nges erai etunganan loeyongit Edeke. Abu Edeke konyarau nges kakoik naka totoke, sek da eroko apak ngin; enyonyoikinit Edeke nges eroko epesikina apetetait naka akwap, araut engarenon mama ejai atur, ayangaun anyoun na mama ejaas itunga.

33 Kane apakio ace kau, abu eong ener mama ejaas idwe ludidik kane kotoma oyekalu, kasodi eong ajaun kede asisia adio kanukec; kasodi alimokin, arai abu eong ainak aitupuset adio naka Yokebed, nekabu ngin kilipia Nges kede Amuram, Papake Musa, kanu ikamunitos aiswamaun icebore yenikamunit alakun itunga. Kosodi Amuram aanyun atapoete naka Edeke ebwoi, arai Emalaika, kododite owai loka agolitomei, kosodi alimokin nges nuapote aiswamaun. Kosodete auruun Musa. Ido mam apotu okuriakata aicorakineta nuka ekabaka, karaida atukurianete. Ajenete ebe ajai akan naka Edeke mama ejai Musa, ido adaunit ngin akiro. Abeit ngin. Mamace nuenera ekabaka, nueneras luka epugae, nuabala idiobore kere, kajenete kesi ebe ajai akan naka Edeke kede Musa. Aso mam kesi akuriaka aosikin nges, kakidingos cut naka akinyanga; neatumitotor ngun noi kanuka idwe ludidik luka Iyudayan, neaponi kitanerekes akinyanga. Konye Musa aponi kibwaikinai nges cut nejai itaker yenididi kosodete aremor nges cut nejaas akinyanga, cut akidingosikec. Naarai, mam kes akuriaka idiobore, ajenete kesi ebe ebwaikinit Edeke Akekan nejai Musa.

34 Eebo, kwana, korai ti oni ajenutu ibore nginpingin, ebe engarenoniwok lokapolon, Emoyo lokalaunan, abu Edeke kijuk Nges. Ido erai Nges engarenoniwok. Ido mamace nuebalas akwapin, ido arai ekenatar kesi ijo biai ka aboliar ijo, kitupit oni engarenoniwok! Abu Edeke ijuk Emoyoke Lokalaunan araut engarenoniwok. Kiany? "Apak edit ido mam akwapin aanyunete Eong bobo. Konye yes kianyunete Eong, naarai abuni Eong ajaut kayes, tomakus do kiton osangeta luka akwap." Aso ejai engarenoniwok lokapolon kaoni, Emoyo Lokalaunan. Kwana ekoto oni aitup engarenon lo ka aswam cut ka ebalas Ngesi oni aswam. Ido engarenon lo mam cut elemari oni awai korot, idari Ngesi oni cut kotoma orot loka ekokoro apak kere. Konye mam Nges epungi esiep ediopet kanu icebore, ka esiep lo kanu icebore. Esalakini ngesi cut ederit erot loka kanu iwadikaere.

35 Ido ajai Musa epelu ebe abeit ngesi ayangar idwe luka Isirael, ido aitup cut kiton atubor angolol nakarengan, cut akalamar ko Yorodan, cut kiton akwap naka aisumunet, cut aitor amodingot. Mam arai Musa kabu kocetor kinga naka ekokoro. mam arai Edeke abu kocetor kinga naka ekokoro. Arai itunga kapotu kocetoros kotoma okokoro, oyangaunete ationis. Aso aoomomata ber oni nuikamunitos iboro lu kwana. (Kitimoieong)

Musa, kwape engarenon loenyonyoikinitai. Angeset edau nges aitodianakin itunga, kanuka aanyuneta ka nukaumokin, nuaraas Edeke bon epedori aswam, abu ngesi kismama aanyuneta nu ka nukaumokin akidingos naka imakio luka Isirael, ido akonyene nuka Isirael, kiton nemonikinotor ejok ebe arai Musa lo loinyonyoikinitai loabeit alemar kes kinga naka akwap kana, kiton akwap ngin nakajokan nakesumunikitai kes. Ido nakeanyunatar iboro lu abu Musa kismama kokiror loka Edeke, apotu kipudakinos atupakin nges. Kosodi nges ayangar kes kinga, kingarenik kes atubio angalol narengan, kotuboros, kiton akwap naewonit ido kiton alosit naka amodingot, naerai akepolou ebe apak naka aitemio

36 Nakijauna ekesa Yesu Kristo kwape eketajaranike, nginibore kere ikiara. Konye, napekerokor etunganan lo edolokina kiton aibatisa naka Emoyo Lokalaunan; etunganan lo, ekoto ber nges kodum adoketait naka aitalaunio. Ekoto ber nges ajaun kede apak naka aigimorio kotoma aijarake. Yes kere kapotu kojaunos kede ngin. Abu kojauna kede apak na. "Kanginikoku yenebuni mama ejai Edeke, nasodit igwerio ber, alecorio, aitetenio. Ido arai mam oni kipedori atitingikin alecorio, kitoduuni do ngin ebe mam oni irai idwe luka Edeke; irai oni idwe lokokal, ido mere idwe luka Edeke," Abala Ebaubuli. Konye arai kititingikini alecorio, ajenete ebe iboro kere iswamaete nepepe kanuka ajokis mama ejaas ngul lueyongitos Edeke." Irai do oni odwe ka adwe nuka Edeke, kipucakini do Ngesi oni ka Emoyo Lokalaunan kiton apak naka alakunio. Itei jo, alecorio ngin, aridakinio, iboro luitorit oni toma.

Ido Isirael kwape aitupuset nakolo, ajai acamun alecorio na.

37 Kwana, nekajaatar kesi Misiri, kosodi Edeke aijukun Musa. Kosodi ngesi arior ebela, kosodete icuc ka ilac atakanuun toma akwap. Abu ngesi korio abear neajai akolong, kosodi aijesar kwap. Abu korio ngin kuju naka akipi, ido kijulakinos kwape kaokot. Kanukinyo, ajai Isirael toma kanaan...Laije toma-toma

Goshen, ejaas toma aibuses; mam akolong abu koloma, mam aitaneta apotu odolokisi kes; kanukinyo, ajaas kwi toma apak naka aibuses!

kwape abu ijo kiswama napekiyuuna ijo. Nginibore kere, ayeete ikweny koipone loetegelikina, ido nginitunganan kere ajijim. Ido, Oo, ikatunga, eipone loaraar nginibore kere luajijim nepekitajaruuno ijo! Aso kodoluni do apak naka aitemio, alecorio, apak naka aitalaunio, aitalaun akonijar kama ejaas iboro luka akwap, "Alacar awai adiolangir kere naepatanikit aigogoloonor ijo." Ijo ekiliokit, ajai ijo aijal aimat esigal, ajalakin aimatakon ajon, apalar alosenene agolaik nueboliaere epuul, ipucinokon luka akuar kere. Iboro ngul kere, ajai ijo aitalaun kamakec, kanuka aiyuun aokot nuka Yesu Kristo. Aitalaun akuanakon! Yesi angora jai ajalakin itimakon apoloor, aitojaar inapenekon, aswam iboro kitegelikina kede nuirai ijo lem. Apak naka aitalaunio! Krwana nuipu ainger kosodete abongor kau; eebo, mam ngin erai ikoku yenika Edeke, itei ijo. Ikoku yenika Edeke esesenu cut Calvary, ido ejeni ebe erai kanuka ajokisike

38 Aso adoketai ngin naka apak, nen nges abunio aibiror awai naepol noi KoIsirael. Nepwaakarotor-kotoma apak, ogeunete itunga aibironor awai, anyoun kosiep kalo kiton osiepije. Ido kotoma aineranakinikec, "Ijeni jo, korai ti oni ajaas kau ngina Misiri. Mam iwokotauon kipudas emugaati loebenen lo." Kotoma akiro ace, korai kwana eong alosit ewai loka akiro nukolo, sek, ngun kesi nuabalasi kesi.

Kwana kotoma apaarasia nukatinen kwana, ti erai, "Oo, kanginikuar nakiuniet, airiamunun naka ailip! Kanginitupuruc nakasabiiti, abongun okanisa! Inyobo ipupi oni? Ibore ngipengin; enyouni ekalimonokinan alimonokin; ikososio; kobongori kau." Itei jo, aso ijai do ijo alosit kwape einono lokaswam. Mam ijo kirai ekamaan. Ekamaan elosi ngina aima, aitodiar akekuan kakonye nuka Edeke ke. Aima Edeke kanu ajokisike; kanginikirot edongakina ngesi mama kangin.

39 Kwape kakiro nuka amina. Arai ipaperosi ijo kede apese naarai ijeni ijo ebe arai epelu, arai ipaperosi ijo kede esapat, kodit ijo. "Ekoto toto eong alosit kede esapat ngol, konye mam eong apedori atitingikin nges." Mam ijo idumuni nges ebuni aipejoikin ijo. Arai, erai eipone ngopengol kanuka apese nejai esapat arai esapat nejai apese. Ilosi ijo kede nges, kitapiapiani ngesi ijo; toto ekoto ijo alosit kede ngin naarai erai ngin epone apese na emina toto. Itei jo, epianikit ijo; emamei amina. Konye mam ijo ipodokit, mam ijo ikoto aitacaun, mam ijo ikoto aanyun nges. Ido erai...erai ibore yenetiono noi. Ido nakebunio ngesi aanyun ijo, ikatunga, ikoto ijo bala ti nges kisunyaki, alosit ore.

Koipone kangopekangol ejaar neibunio ijo, "Inyobo elimonokina ngesi adaun aojau? Dobodo iboro lukere ka nginibore kere?" itei jo, mam ijo ilomarit toma amina.

Konye neiminaikinor ijo toma kangin Akirot, kwape abu Emoyo koinakina ijo aikwanyaret atupuruc na, itei jo, "Aminaikin toma kangin Akirot." Aticepak arai ngun ajai Ngesi einer kede ijo. Adongakin! Erai aijar namam edaun, kangin Akirot naka Edeke. Erai aiyalama alosit okanisa, kojautene edio kere. Arai emwana, elilim, ipasit, arai epegasi itunga, ededeng, nuiswamaete kesi kere, esalit erai aiyalama airar Akirot naka Ejakait. Akepolou ijai do ijo toma amina kede Kristo, itei jo, imanakit ijo alosit okanisa.

40 "Ijeni jo, naminat, kwana erai atupuruc kanasabiiti bobo, aomit eong ibusakinit oni ailongar ludidik kasodete alosit ngina. Ikatunga, epiana ngin!" itei jo, mam ijo ijai toma amina.

Konye cut arai ijai ijo toma amina, mam ijo ipedori atitingikin kiton atupuruc na asabiiti adolon, ejai ijo alosit ngina kede kes. Ido kidumuni oni kasodete ajalakin...Itunga luka Edeke, mam kitetegete ijo. Kanukinyo, eraas kesi-eraas kesi inacan ka anacan. Kwape aminar eong einer, "iyatakini ijo aidikor kwape amacuc nuimumwa kotoma atupuruc naelilim." Ngin-mam ngin elelei, imorikikina nepepe, ijeni jo einikina nepepe. Ido nepekiyasia alilimor, iyatakini aiminaikin noi. Koipone kangol ebeitor ojai kede oni. Iyatakini alilimor...

Kijalata ijo ipapero luka akwap.  
Kosalak iyatakit adongakina cut osiepike.

41 Ido nuimina oni, nginidiopet kayenice, mere ebe irai oni itunganan ice; konye erai Kristo kanejai idiopet kayenice, kimina oni, kiany jo. Erai Edeke ejai toma aijarawok, nges kimina oni. Kwana kimina oni. Kwana imina oni ariamunun nepepe. Iminenena isio ayoere ekosio lomojon:

Kisirerengitete ayenis naeyeni  
Itaunowok kotoma amina naka Ekristayone;  
Eidicane loka aomisio nuka ajen  
Eputosi kede kangol loka Akuju.

Itei jo, eidicane loka aomisio nuka ajen eputosi kede kangol loka Okuju.  
Koingaren naka ecolong loka Papawok,  
Kiyangari oni ailipawok naegogong  
Akuriauwok, amunowok, alosikinetawok, eputosi,  
Ainapakinawok ka aiyalongongowok.

Kiany? Eebo lokapolon! Ejaunos ice kede arereng, iyalamikin oni kere kanukangin. Naepupia idiopet

erono, oni kerei ipupi erono kede nges. Oni, ikoto oni kere ajaas nepepe. Eipone ngol kibusakinitor oni ajaas.

42 Koipone ngol abeitor Isirael ajaut. Konye kabu koraun alangir, Oo, emagaati loemojongit loebenen, emugaati Loimalaikan! Eebo, inyobodo kipodokinit isio kede emugaati loemojongit kobenen lo? Apas itaunokosi ngol! Ido nginibore kere erono. Ido-ido emaanu lo lomojong loecakunun kanginibong, kanukinyo, ajok do ti isio ainyam icemutugulun ka edia koMisiri." Itei jo, mam ikecetaun akapakina kanuka alosit.

Ido napekegeuna ekiliokit arai aberu angurian kanuikamunit alosit okanisa, aiteg alosit okanisa, mam ekapakina alosit. Abeit ngin. Ejai ibore yenerono kanenice.

Oo, arai imina ijo Edeke, ido koomoomoi ebe ilosi ijo kuju, ido yesi kere ilosete nepepe!

Eidicane loepone ali, aiyalama naepone ali naka Edeke,

Agonga akan namam edaun;

Oo, ainapakin naisirerengitai ajaut kede Ejakaitika kosiep,

Agonga akan namam edaun.

Kiyei oni ikososiso ngul.

Kimori oni iwokocan luanginiduc

Kibwoki oni alangirusiowok nukanginipaaran

Kanginiduc kanuka alosit naka nginitunganan

Akiyo nukaitim.

Nekitiakakinor oni,

Eyangauni apipil nakotoma;

Konye kisalagini oni irucokina kotauon,

Ido amunosi airiamun bobo kotoma apak naka airiamun naka ailip naetupakini. (Eebo, loapolon, iroko oni irucokina kotauon!)

43 Kwana ijai ijo akapanakin kanuka alosit, itei jo, ikapakina ijo kanuka alosit toma akwap naka aisumunet. Apakio nuka aigimorio, ngin nges alaaro naetiono; amodingot, apakio nuka aigimorio

Isirael, kotoma apakike naka aigimorio, abu ogeu ecelet ka epeget idiopet ka yenice, ka apalunit emugaati. Ido akotosi abongor Misiri.

kosodete ageun angurian kanuka engarenon kes. Oo, akurianikinitos ebe ajai ngesi aingarenikin kes awai; akaulo na nges aitodiar bon kwape engarenon, ido abu Edeke kitigogong ebe erai ngesi engarenon. Eebo, aticepak kismama oni koipone kalo ikerepikit motimot. Ido-ido aticepak kiolio oni, kere orot loibucara," arai, icebore kangin, itei jo, eneranakin asurokin Edeke, asurokin Musa, Edeke kede Ekengarenon.

44 Kwana kidolok oni aiboisit, nakitemara oni ebe, "Mam eong ajeni arai epeleikinit Akirot Nu, arai mam," "Ido mam eong ajeni nuikamunitos Emoyo Lokalaunan; acoikinit eong nuikamunitos Ngun. Ajeni eong ice lumam," eebo, kolot Misiri. Kiany?

Konye arai cut kiinakina ijo asalakinit korot, kosalak kede Ekengarenon, Emoyo Lokalaunan, kosalak kede Akirot. Ejok ngin. Ingarenikini ijo cut kotoma okokoro, esokot loka Akirot. Ido mam ikuriana kanukangin. Mam imusungi, kingarakini ijo arai kimusunguna ijo. Kitangaleuni amusungen kon kere, kismamauni Emoyo Lokalaunan

45 Kwana kidumuni oni ebe korot kalo, akaulo na kesi aikonakin nen, kapotu kodolokis aboisit nako Koreb. Ido K-o-r-e-b, Koreb, aso kidumuni oni ebe...Etetemutu ber oni ekiror ngol ejok. Ekiror ngol ebe Koreb akepolou ebe "Aboisit naeonit" arai "Amodingot"

Ido kilomu oni kinga naka eidicane idiopet kayenice kotoma okanisa, ido kinga naka eidcane kede Emoyo Lokalaunan, eyangauni ngin oni kiton amodingot, emamei ibore yenejari itido kotomake. Itei jo, a-amodingot, naka ikito ludidik kede ikukwa kotomakec, ijo kijenunitor nuarai ngin? Erai ngin akwenut nadidi naketiai naemameete akipi, abu koridakin bon kiton nearaunor ekukuai. Ido kianyu ijo icetunganan ikoninen, aticepak etau loka etiai loicokicokitai ejok, aticepak arai akwenut nadidi nalibilibi arai icebore. Konye do bobo ebe abu koridakin bon kiton araun ekukuai, ekwacakwacai idiobore kere, ijani ijo, amoot aibucanareta. Ibore bon yenipuda ngin nges akipi. Nges ngun kere. Kipuda ngin a- aisikwaruunio arai abwangio, aisiteteunio kama ejai Ejakait ebuni-ebuni abwangun bon, kibwaik ijo nges toma akipi

46 Konye, eraun do nen ne engirikinatar ngul luiboiete aboisit kangin ijautenesio luka aiboisit kangin. Ido ngul luipudas aijar kotoma ojautene kangol, loeraar nginibore kere anang ka epeget, ka ecelet ka ajurungunit koipone kangol, eebo, ipedori ijo aijar kotoma ojautene kangol, odaun kwangin. Konye mam kibusakinit oni aijar kangina, mam ebeit oni aibois kangina.

Kwana, Koreb naa ngesi aboisit na apotu itunga itakalanyatar Edeke, naarai apotu iiriata kotoma aboisit kana kiton adolokin ojautene loo. Kosodi Ngesi ainyakun kesi bobo aiboisit ngipengin, naarai mam



kesi apotu opedosi alosit orot angon. Apotu opaasi awai na-na erot loapolon, ogeunete aitup erot ece losiep. Kosodi ngin aidupor Edeke iswamauni ice bore yenetiono. Abu ngin idupo Edeke einakini Musa alemun ebela lo etube lo atubokina ngesi atekerin, kosodi ainom atiiba, kanu aitolomuun akipi.

Kwana ejai ibore yenejok aisisiaun kane arai tikapedorete oni adumun ngin, itei jo. Ido naarai ipaanari oni awai kosodete aigir ayaio, kasodete ayenikin kede akwapin, ka ice boro, abu koinak Edeke alemun itubesia luka akwapin kosodi aisen okoku ke obe kede etube ngol, ko Calvary, tetere oni kiosikin. Imisikinit jo nuapeleikinit eong?

47 Kwana, kanu adumakin itunga luu adisikipi, kedautu adolore ngina, kaponi kitaraunai aiboisit naonit naa araun Calvary. Ido abu Edeke olimok Musa kangina, kosodi atemar ebe, "olem Ebela ka imakio, kolototo ngaren, ido abuni eong aibwo katiida koingarenekus." Ido atiida naa ngesi Kristo. Ido abu Musa olem ebela lo atubokina ngesi etekerin nuka Isirael kosodi ainomakin itubesia luka Edeke atiida. Itei jo? Abu imarak adikanareta nu itunga obela loo. Lo, tikabeitor aisen itunga. Aiboisit na aisen itunga, abu osen atiida. Ido atiida, kotoma aswam naka Edeke, abu koyangau aitajario, oyangau da akipi ne ajaas itunga lu ajaas amudiar. Abu oyangau aijar ne ejaasi itunga lu ajaas atwakare. Ido ngun abu Edeke iswama opone loalemun Ake-Akepedor naka ebela loetube, kosodi aiweniwenikin akon diakanareta kede akadiakanareta obela loo; ne ti abeitor aisen oni, konye abu kosen Kristo; kotoma Ke kolomunete akipi, nu erai ekes polou "Emoyo," abu Emoyo lokalaunan kolom kotoma ke, ainakin oni aijar. Kwana ijaar oni kede aijar na ikaru kere. Kwana, atiida ngin arai Kristo. Kwana ikoto oni amisiikin.

48 Aanyunun eong aputosia nuipu nuka atiida kana nuinomitos luka acoa. Abu kaany adiopet kanu epolok kakere, pac, kitoni ne ajaar i-imooru yen didi idokokina oukot. Ido-ido obeite Musa ti aisen atiida naa, ido ojai do Isirael kwap kede aikopo na ecaai, adumakin kesi numatan nu aleleununete kotoma atiida kana. Kwana eraasi ngun aomisio nuka itunga.

Konye naetolumana atiida na akekipi, ajaas itunga luadeparitos imilinin iyarei, kilema, imongin, akaalai kanginibore kere luapotu komatata kotoma atubai nuka akipi kama kangin. Arai aleles naebulibulitoi naalomuni kinga kangina

49 koiponengol etamitotor kesi aitaraun Kristo, Emoyo Lokalaunan lolo. "Erai bon aicokicok motimot." Itei jo, edolit ngin ainakin ijo aiyuun ebe ejai Edeke. Mam.

Erai akipi nuipu! Abala Daudi ebe, "Iapanar eikopo ka!" Erai atan naka Emoyo Lokalaunan.

Ekuriaka itunga ngin. Icetunga ebalas, "Eebo, akuriana eong motimot abuni eong aswam nu arai kwa arai ti korai eong apedori Alomar neidul mot. Apedori eong aitodikin ijo ebe abu itunganan olot nelwana noi." Konye mam ekoto adodit bala mam itunganan elosit nelwana noi. Itei jo? Eebo, dobodo lu mam elositos nelwana noi?

50 kwana, apotu ajaasi kede icetunga luapotu olomasi toma akuan, kosodete apaar awai korot. Ido-ido komam erai Edeke, konye apotu itunga kolomasi...kanu eingarenone loaronon, ka ice da, koinakini kes apaar nelwana korot, kolomarete opegeta. Kosodi ajokit adodikin kes akwap kere, "itei jo ngin! Itei ngin!"

Aso, akoto ngo atupuruc naa aibwo kasodi adodiar kau ngina ne apotu itomoneta lu imilinin luepu noi lumam itegearitos. Dobodo kesi? Itei jo, itei jo ekecejautene. Itei jo etunganan kwape Eichmann lolo, kede adoketai ke na...Ebakasi kesi ebe, "Eraasi ipetekotin itunga lu edit aijen ido inerasi ikiro nu epiaka, komam esiomitos da," ka ace da kwangin. Ite ber ijo Eichmann, ediopet kotoma otunga lu esiomitos noi kakwap kere. Ido abu koiyar idwe, angor kede ikiliok imilinin ikanykape, itauon imilinin ikanykape. Mam ebeit jo adodikin itunga etunganan kwangon.

51 Konye itunganan yen mam epedorit aisiom ejok, komam epedorit eticepak asiomun ekiror ece Kobaibuli ejok, karaibo elimunit icebore araibo iswamat nueroko, araibo iswamat abucaret ace, idumuni ijo luiyemuto ekotosi aiwadik ngun apapulai kanginiboisit kere, kobakasi ebe, " Mam ebeit amunokina kes."

Aso karai mam ebeit amunokin ngun, kanukinyo mam eraar asioman, ka iceboro kede luacoa luejatatar kesi lolo? Itei ijo Adolf Hitler. Itei jo aomisio nu akwapin lolo. Kosesen ber jo kes. Iriamar kede alimunet na mojong na ebala ebe, "Inyamat luenyami Atudo naesamai naaberu nges enyami lokiliokit da"

Ibore bon yenebeit jo aswam nges ajenun, kotoma Omoyo Lokalaunan, aitiak nukajokak ka nukaronok, kosodi ayangar naejok arai naerono.

52 Kwana, kidumuni oni ebe Calvary na nakejaatar kesi, kosodete akipi nuka aijar abulun kinga kanuka itunga.

Kwana, icetunga eomitos kotauon, ka aomisiokec ebe, abu Isirael kere komat, kosodete kitonyoutu akecesigirian kosodete ayenikin auno akaalakec, kaceda, kosodete adakun ikecedwe kosodete alosit kitoni nenice, kosodete ajalakin atiida kanen, eisi. Ibucara ngin.

Atupit atiida ngin kes, ido akipi da ngun atupito kes. Kwana Ikorinton losodit esula loitomonet,

eyuunit eong, ido esula ikokoron itomonadiope, kipedori ijo adumun ngin, ebe "Atupit atiida ngin Isirael." Nealosete kesi kere agear kapak kangin, aupasi atiida ka kesi, ido atupitos akipi kes.

53 Eipone lo ejokar aitupuset ngin, ido a...aicatunet naajokan ka edobo kanuka ekeyuunan lolo loejeni ebe atiida ngin naaponi kosenoi ka akipi ngun nuaponi kobukonoi kangina ko Calvary, eupasi kaoni neilosoni kere. Oo, ikatunga! Mam ebuni abongor aiboisit ace, kosodi atemar, "Eebo, kijaar isio ka akipi kappa kaya, kangina." Kijaar oni akipi lolo, kanepokane, naarai arai atiida ngin Kristo! Ido erai Kristo Nges ngopengol bian lolo ka ykar kere.

Itei jo, atupit atiida ngin Isirael. Mam kesi atupitos atiida, konye atiida nges atupit kes. Amen. Alosi Isirael korotokec. Kajaatar kesi ibore idiopet yenabeit aswam ngesi "Ader erot loitenara, cut kitoni akwap naka aisumunete. Ido atiida ka akipi atuputos kes.

Atupit kes atiida'....

Elimokin ijo Ikorinton losodit, esula loitomonet kwangin. Eebo.

...arai Atiida ngin Kristo.

54 Abu Edeke olema itubesia luka itunga kosodi aibwaikin kes toma Kristo, kosodi aisen Nges. Abu ijo komisiik ebe, ajai aipany toma kangin, neabu Musa kobel. Ido kajaatar Yesu aipany, nakenomere Nges, "Kaponi Nges kimusungai kanuka aibucanaretawok, ido kanuka imacarinike kaponi kitangaleu oni." Kotoma Aijar ngin nges alomunatar Akipi nuka Aijar nuinumunumi oni lolo!

55 Kwana, kanu adumun Ajar naa, kiitu, esalit Aijar naka Kristo kede Ekanisa. Aleluia! Oo, korai tikapedorete oni adulokin aomisiokon nen adakin atomon nuetupakinete! Mam Yesu ejalakini Ekanisa. Ebuni eong ajaun kayes apaarasia kere, kiton asangeta luka akwap." Erai itunga nges ejalakinete Kristo, konye mere Kristo ejalakini itunga.

Abu Isiraei kojolak aleles, mere aleles ajalakini Isirael. Kiany? Naara. , kasideleleunit Ebaibuli ngin ejok cut, "Atiida ka akipi nges atupitos Isirael." Atupit kes! Nealosete kesi kere alosi ngin da.

56 Oo, akoto eong katupuruc kana, arai ti oni ajaatar apak, apukor kotoma kosula losodit loka Yosua, neabalar Ngesi ebe, "Nginiboisit kere neicakete itauon luka akejekus, kainak eong mamakus. Neilosoni kere, ejai Ejakait Ekonideke ka ijo. Mam ikurianar idiotunganan. Kotitingor! Kere neicakakini ijo akejukon, ajai nepenen ka ijo, kanu aicokicok ka ainakin ijo aijar "Ajaun eong kede ijo apaarasia kere, kiton osange loka atur."Kristo ngopengol bian, lolo, ka ikar kere. Ikisila luka Edeke.

Edeke ngopengol eupasi kede Ekekanisa atupuruc na. Kamatata kama ejai atapar kangina. Nepekicakakini ijo akeju kere, ngipengina cut ebuni Edeke ajaut kede ijo, kanu aicokicok ka ainakin ijo Aijar. "Abuni eong ajaut kayes apaarasia kere, kiton osange loka atur." Kristo Ngesi ngopengol bian, lolo, ka ikar kere. Ikisila luka Edeke.

57 Kwana ibala ijo ebe, "Aso, Onac Branham inyobodo eraar ebe mam oni kiswamai iboro ti luabeit oni aswam? Epone boa ali mam einakinetauwok ka iboro kotoma okanisa edolokinatar kiton aiboisit, naebeit kes kojaas? Koipone bo ali eraar ebe mam ikanisan ikeunos kiton aiboisit na kibusakinit ti kes kojaas?" Itunga, kotoma, apakio nuka agimorio, Eraraaros awai kwape kabu Isirael kiswama. Eomitos ebe ajalaki Edeke kes.

Konye, kiitu ebe, mam Atiida abu kinyeik Isreal. Isirael abu kinyekik atiida, abu kimurok nuikamunitos Atiida ajaut kakes apak kere. Ajai cut nepenen, aupasi cut kede kes kiton angeset naka erot. "Atupit kes. "Mam arai ebe, mam eneranakin kakes. Mam arai ebe mam apupi kes arai ebe mam aseseni kes.

Ido mam Kristo da ikoni nen kede ekanisa lolo, mam erai ebe mam Nges inera. Ice kotoma yesi ibiroros, ido iswamata nueroko, ido kitwakiasi yesi aiyalama ngin, ido aokikisi akusikipi. Eroko Ngesi mam inerasi kede ijo. Etupit Ngesi ijo. Ejeni nginikunyakinet kere naiswamauni ijo ido nginibore yeniswamai ijo. Ipuda Ngesi apupun ijo iworouni Nges toma aiboisit

58 Ido adakun na napolon naka Ipetekootin lolo, idarit Edeke ijo anyaraun ngesi toma aswam. Mam Edeke elwana kamakon tape mam inerasi kajo. Karaida kiswamat nueroko, kasodete adiakar, kasodi aibelokin Nges epur, ido-ido keswamata da numam kibusakinit, konye eroko ejai kaoni.

Abala Ebaibuli ebe, "Atupitos akipi idwe luka Isirael." Nakejakkia kes akure, ajenete kesi ebe ayapiete akipi.

Kwana, iboro lu eraas lueyaitos ikisila. Eswamae loka Edeke kere, erai ikisila kitobwotos. Kwana kibuni oni...Kabwoutu ber ipak edit.

59 Ayangasi ber oni aaanyunete kwapenat akwap. Irimi, kangin isawan akaiserei ka luongon ongetakin airimoret adiopet, itekoora adoketait naa...Mam oni kipedoritor, kede acoawok na akwap, aiswamaun

esawa kanuka aidarit apak ejok. Kangin apak edit, isawan lukajokak kakere luiswamanunete kesi, kotoma apak naka ekaru, iyatakinete arai elemarete adakikan luipu. Konye akwap mam ibiror konye esalakinit ikoni nepenen kangol tikatikat. Kitekoora kitoni lucoa lolo, epadorete itunga luengicete akiro nuapak alimokin ijo becebec ebe, kotoma apak naka ikar akaisarei arai akaisakany lueponitos koingaren, ebuni elap kede akolong iriamakin. Nakedauna nges arimorete ke naisawan akaisarei ka luongon, kosodi angetakin airimoreteke naka apak kangin, mam etwaniari tikatikat. Aleluia! Kitokoora cut, kanu naarai ekere kotom okisil loka Edeke.

60 Ejenete kesi cut ejok apak na ikeunotor akipi ka aijesar Angololo, cut kiton idakikan, naarai ejenete apak na elumoro elap. Ido esipokinit Edeke nginbore kere toma ainapete kanu ekisil. Ido nakelumora elap ngol, kijesaros akipi angolol. Ido nakikeunor elap, ikeunos akipi kede nges. Ido ejenete kesi cut ejok, kanuka amar apak, nakijesaror elap kwap. Epadorete aibwaikin ngin toma akalenda nakiitununere akiro kanuka ikar lueponitos koingaren, kosodete alimokin ijo, kiton edakikat, loegeunatar akipi ngun ajesar angolol. Cut, eipone ngol nges elumoro elap, naarai esipokinitai toma ainapeta nuka ekisil loka Edeke.

61 Abwoi eong apaaran kaya, kariri naka Ecor loka Michigan. Kasodi eong alosit kiton Ocor loka Superior, korotoka alosit Canada, aboisit ngin naka alalan naka akipi. Kasodi eong aibwo kangina, kasodi eong aomoom ebe, "Amairon bodo adi aderor awojau naka angolol kana!" Ido akaulo na eong aitubor ko mich... arai Agolol nako Superior kiton Angololo nako Michigan, nepetai bala Angolololin nueriakasi. Ido kiton ngina, anyoun Angolol nako Superior kiton Angololo nako Michigan kiton Angololo nako Ontario, ido bon... ka Huron, ka Angololin kere nepepe. Idi bodo ibiloni kirwan ibilonin kirwan ibilionin luka ipipai luka akipi nuejokak nueperete kotoma Angololin kangun!

Ido kangina kotoma Nevada, ka kotoma Arizona, New Mexco, kide nako California, eperete imilionin luka aekas nuka alupok nueokotos, komwaka. Nuiboliaikitos noi, korai ti akipi kopadorete adolore alupok ngun, ti akwap na epedoo aitan akwap kere. Komameete itunga lueyarit etengei, ido ajaun kede luilamara kiton abukonor angololin. Abeit ngin! Imilionin luka aekas nuepedorete aitolomuun imilionin luka itaanin luka acok ka ekabej, ka emarooqe ka-ka lettuce, ka radishes ka celery, ka akolil, kaiceda kere. Ti alupok epedosi aitolomuun, erai-kipuda bon akipi.

62 Ido akipi nu kane, ido alupok da nu kalailo. Kwana kipedori oni asesen ngin, ido kijeni ebe epedori aswam ngun, naarai kipedori oni ainwak akipi kasodete adumu ebe elaete, kasodete ainwak akipi kasodete adumun ebe kiboliaikinitos. Kwana, nu ti kimiela oni kere mam epadorete aisorikikin kes nepepe. Konye, ejai ekisi ido ekisil ngol erai loirii iboro nepepe. Kwana korai apadorete oni aswam kwa ekisi kalo kirii iboro nepepe. Tikipedo acokicok kanginboisit kere na alupok, alemun akipi kocorin kasodete aicokicok ngin. Konye ejaun oni aswam kwa ejaar ekisil loirii iboro nepepe. Mam oni kipedori eimiel ngin eimiel kangina. Mam oni kipedori ailulu ngin ailulu kangina, mam oni kipedori aibwolol ngin aibwolol kangina. Ejai oni aswam kwa ijaar ekisil loirii iboro nepepe kanu aitodol kes ngina. Kibwaikinit Edeke nginibore toma okisil.

63 Kane, ajai eong aomoom, mam eong ajeni arai alimokinitor lem eong yes nu, arai mam. Ajai eong ngina Kentucky, ameja ikunyuko, kede Onac Wood, bala ekar ediopet kau. Kasodete isio...Asubitos ikunyuko bala ekidioko, kasodete isio alosit ore ecetunganan, aingitun kanu ameja. Ajaatatar etunganan aekas nuipu nuka alupok, ido kotoma alupok kanu ajai amagoro naapol. Konye abu Onac Woods kalimok eong, ebe, "Ebe arai etunganan ngol ekapiirit. Erai-erai ngesi lomam kiyuunit." Aso abala ngesi ebe ajeni ngol, aso nges...arai papake ajeni nges, kapedori ngesi alosit kosodi aingitun arai ti isio kidum acamakinio alosit ameja.

Kasodete alosit kiton buke etunganan kangol. Ido nges kede ecetunganan, kes kere kotoma apak naikar akaisakanykaarei, eboiete kokwap naka ekitoi laka apol (apple). Kosodi ejakait Wood alosit nejai etunganan lo, kotema nges atiar, "Eong apedori ameja ber ipak edit aiboisitikon?" Kotema atiar, "Eebo," ebal ebe, "Eebo." Kotema ebe, Wood boa li ijo? Ijo irai esapatake ka Jim Wood?

Kotema ebe, "Arai eong"

Kotema nges ebe, "Eebo, arai epon Jim loemunoono noi, kaceda." Kotema atiar, "Ipedori ijo ameja neikoto ijo kere, kaiboisit ka. Ajaas eong kede aekas nuipu akwat ne, kingarakin. Kolot toma okutuo ngun, neikoto ijo losit kere. Olacakina."

Kasodi eong aboikin toma omotoka, naarai aomit eong ebe mam ekalimonokinan epadorete aupakin ejok nepepe kede ekapirit, arai tikilosi isio ailipun asianut kama ejai ekapirit.

64 Aso do akaulo na apak naedit, kotema Onac Wood, "Eebo, kwana, eong apedori ayangaun ekacokon da? Aomit eong bala ti ejok eong ayangaun ngesi da."

Kosodi etunganan loamojongit lo aibelokin kobelake, kosodi atemar, "Wood, ipeleikinit ijo alimokin eong ebe, kijesun do ijo kwap noi, kiton nakeraar ijo ajaut kede ekalimonokin neilos ijo kere?"

Kosodi kanen, abu eong aomoom, akaulo ebe, ejok eong Alomun komotoka. Aso abu eong alom kinga

naka emotoka, kasodi eong einarekin kede ejakait loamojongit lo idakikan idis. Kosodi ngesi ainakin eong amisiikin katipet noi ebe ammamei aiswamanara naepol kede ikalimonokinak, naarai aomimit ngesi ebe kinerasi akiro numam ejenete.

Ktema ngesi atiar, "Edacete iboro lumam kes ejenete. Eebo," ebala ebe arai kin3rasi etunganan kede eong ngesi kojoni nuinera." Kwana nges ajen naejok" Nges ajen naejok. Kotemari ebe, "Kwana arai kinerasi etunganan ka eong, mam eong akoto ngesi einer icebore yeneomit ngesi aomit komam ejeni cut. Akoto ngesi einer ibore kjeni ibore yenejai ngesi einer." "Eebo, abu eong ariima ngin. Abu eong ayongak ibore ngin kane ajai ejakait loamojongit lo.

Kasodi do eong atemar ebe, "eebo, ejena ebe, nginitunganan ejaasi kede nu eomoit.

65 Kosodi ngesi atemar ebe, "Ajai ekalimonokinan loabu kobu akwap naa, ikar idis kau, loabu ojaikin airiamun na ajaikina Acton." Kosodi ngesi atemar ebe, "Abu ekalimonokinan lo lomam ajena kotoma akwap kana, akuar adiopet kolimok a- amucaalat naeboie atukos, 'Kijaatar ijo etaabala oisaokon. Ido irai ijo amucalat mutan. Ido kijaatar inac na edeka kokuju korongat laiye. Ekekoror erai mutan-mutan. Ajai atwanare kede engoti kotoma akoik. Kobala ebe, "Oyanga etaabala ido kidokok mama ejai inacikon, ido kolimok nges ebe, "EBALA EJAKAIT KWANATA, mam nges elosi atwanare, konye ejari,""

kotema ebe, "Aberu ngipongin arai apapero kosi." Kosodi atemar "Apotu isio ayangasi aberu na... Etaabala lo; arai ekiliokit lo mama ejai itunganan." Nasodit abala ngesi ebe, "Aberu na, kilosit eong kede akaberu ngina atupuruc ngin kasodete asalakin, aidar aberu ngin. Ido arono ekejautene noi! Apotu imurok da kodaunitos apalun nges, sek. Arono ejauteneke kiton nearaar isio aidak nges kede aisuuuka, adakun nges kanu adakakin akalaya naka otaada, ka ainyakar nges." Ebala ebe, "Akuar adiopet kangina, abu elulu odakun lo asubit bala ajai itunganan yenabu kotwana."

66 Arai do ngol Ben kangina, nges ajai ayangar etaabala, ngina. Eyuunit eong bala arai ijo, mam, Ben? [Kotemari Onac Ben ebe, "Amen. Amen."] Arai Onac Ben kangina, etingit etaabala ngol, 'naarai abu ngesi koyanga nejai aberu kangina.

Kosodi atemar ebe, "Atupuruc natupakini, ajai ya ainyam apols nuagesitai kiwowatete." Kosodi atemar, "Mam bon nges iswamai akeswam konye iswamai aswam naka edunyet da. Engalei cut ejok!" Abala ngesi ebe, "Kwana aumonok duc eong, arai tope aanyunitor eong ekalimonokinan ngol, ajeni nuenera ngesi," ebala, "eong- ti eong akoto ainerakin kede nges."

Kongolia Onac Wood neajai eong, kosodi angoliar neajai ngesi. Abwoi eong kangina, epwokuna, enyinyirite, ido kamunaara, edukurununei lem toma amagoro, ido-ido aokot nuka ikunyuko kiriamitos awate kosi kere. Kasodi do eong atemar ebe, "Eebo," katema "Ipeleikinit ijo ebe ti ijo kinerakinok kede ekesa lo ido ti nges elimoki ijo eipone lo abu ngesi kiswamauna ngun?"

Kotema ngesi ebe, "Eebo, loapolon, ngun nges aapeleikinit eong."

Katema eong ebe, "Eebo, erai ngin-ngin ibore yenejok."

67 Ajai eong ainyam adiopet kotoma apols ke. Ajai imukule yenididi yenidos aiswamaun kokujukec, ijeni jo, kotoma angeset na ekar, olap loikanyetkauni. Aso etingit eong apol yenididi yen, ido anyami eong ngin. Kasodi eong atemar, "Ejok apol ngin noi." Eong ebe, "Aojai bo naitia ai adau adau ekitoi ngol kanen?"

"Oo," Kotema ngesi ebe, "Eong eraikini ekitoi ngol nen, ikar akaisauni arai akaisaongon kau, arai icebore."

"Eebo, loapolon." Katema eong ebe, "Akoto ber eong aingit ijo aingiset." Eong ebe, "Epone bo ali kotoma akwap...Aseseni eong apols ngun acakununos kokitoi kangol, ido akwi ke ejaas araraanar, ido kane erai akidingos naka elap loka okanyetkauni." Kasodi eong atemar ebe, "Mam oni kidumunitor karaida alilim mam oni kidumunitor karaida akako arai idiobore, konye ejaas akwi ngun araraanar kotoma okitoi. Kanukinyo kiswamatar ngun?"

Kotema ngesi ebe, "Anyou emina kokitoi."

"Oo," Katema eong ebe, "Aibodo abu emina kolot?"

Kotema ngesi ebe, kwap naka alias,"

Kasodi eong atemar, "Dobodo ebuni ngesi adaun aojau naitia ai kiboie kangina?"

Kotema ngesi ebe, "Kiton poro."

68 Kasodi eong atemar, "Obonguni do kuju, kosodi ayangaun ijo akwi nuitetiak kanuka etolim, apols nuitetiak ainyam."

Kotema ngesi ebe, "Erai ngin abeit. Abeit cut."

Katema eong ebe, "Eebo, akoto eong aingit ijo icebore, loapolon. Inera ijo nuikamunitos ikesa lu lumam ejenete nuinerasi." Katema eong, "Kipedori ijo aitetemikin eong acoa na ejalakina emina ngol ekitoi? Esalaki emina ngol angetakin aporo, ti ekitoi etwana. Ti ijo kiyara ekitoi. Ikurut yenaijar ejai toma omina ngol," Aso abu eong katema ebe, "Tikeyara ekitoi. Anyoene acoa einakini emina ngol anyoun kanejai ekitoi ngol, alosit kwap toma alias, ido aiboi kitoni apak naka aporo, kosodi abongun bobo kuju kosodi aitolomuun bobo apols ace?" Katema eong ebe, "Ejai ece ekisil, ejai ekisil loesube, acecoa nges apesikini ekisil lo toma ainapeta. Mere ngun bon, konye acoa ngipengin nges aitwasamai ekisil ngol, loitekeriari emina ngol kiton kwap naka alias nuka ekitoi, kosodi abongun bobo."

Kotema ngesi ebe, "Mam eong ajaunatar kede aomisiot kaangin."

Katemari eong ebe, "Ijo kipedori...Arai mam ijo kipedori ajenun acoa na einakini emina ngol anyoun atenun nuka ekitoi kitoni alias, ka ainyakun, acoa ngipengin nges alimokini eong akuar ngin ebe, 'Kolot, kidokok etaabala ngol mama ejai aberu.'"

Kotema ngesi ebe, "Ijo nges ekalimonokinan ngol?"

Atemari ebe, "Eebo, lokapolon, erai ngin abeit."

69 Okaru je ajai eong ngina (atwana ngesi), ido nakeboia apuserutuke kobalasa, ekuli apols kokitoi kangopekangol. Onac...Nasodit ber abeit kwi airutar isio, mam kesi ajenete isio. Kasodi eong alosit alimokin nges nuikamunitos ngun, ebe apotu isio adumunitos acamakinio kama ejai ngol. Kasodi eong alimokin ngesi nuikamunitos ngun, kotema, "Abu kolimo alimoret naepol kanuka Kristo eroko etwana."

Itei jo, nuiswamai ekitoi ngol, acoa nakitekeriari ngun kwap? Erai ekisil. Erai ekisil ngol nges asipoki Edeke toma ainapeta. Ido ekisil ngol, erai ekisil loka Edeke nges ebuni airicit akiro. Amen.

Ijeni ijo, mam eong apodo eipone lo kimonyia ijo, kosodi atemar-atemar kwana, "Mam ebuni, mam akolong elosi aica akamu na." Ebuni aica, ejaceda. Arai adoketai kani kibunio ijo einer ebe, "eong-eong-mam eong abuni acamakin akuar adolon." Adaunite eong abunore, kwape kwangin. Naarai ibore yenikijari oni kotomake yen, yenenyaritai akwap, eyait ekisil loka Edeke.

70 Kwana, inacan ka anacan, akoto eong aingit yes icebore. Aso arai kiuritai oni kede Emoyo loka Edeke...Mam Edeke ejaatar aboisio nudidik kononok ka aiboisio nutiek kogogong, erai cut Ngesi Edeke! Ido arai kijaatar ijo Edeke loilosikina tomakon, kiton nekaraar ebe etorube bon, erai apedor nailosikina aiswamaun akwap nakitetet. Erai epedori nailosikina asubun elap lokitetet ka eswamae loitetet. Erai Edeke, ido egogong! Ido kwape kwana kanginiyuunan kotoma kane ejaas ka aijar naka ikar kere, na erai, Emoyo loka Edeke kotomakon. Apedor nailosikina aitonyoun luka atwak, naitangaleuni lukadekak, nges ebuni asipokin kanginidusaunet toma adoketai najokan. Konye ijo, erai ekisil kiyait, Emoyo ngol loejai tomakon. Iraas yesi odwe ka adwe nuka Edeke. Emoyo ngopengol loijaatar ijo kotomakon, ebuni aitaruun ijo apaaran naka ajarun.

71 Yesu, neajaar Ngesi ne toma akwap, naketwania abu Eketau kijesar okatwak, "Kosodi alimonoki imoyon luajaas ojeera, imoyon luajaas ojeera, lumam apotu kitoronokinos kotoma atitingikin naka apaarasia nuka Noah." Abu akekuan kolot ates. Konye eroko Nges etwana, abu kititngik Emoyo ke toma akanin nuka Edeke. Abu Emoyo ke kolot mama ejai Edeke; eketau abu kolot ogeena; kosodi akekuan alosit ates. Kaponi kigalioroi Nges kotoma ajarun kiton nakedaunia nuwadikaere aitodolikin. Mam Nges apedori abongun, naarai abeit Nges aboi ates adaun apaarasia auni ka akuaresia auni. Konye naketodolikinor aiwadikaere, aponi kolemarai agalisit

72 Ido kitwaka oni, elosete imoyonowok kwap naka elutaari loka Edeke; neabu eong adumuna arereng aanyun, aparasia adis okau, kwape kijeniata yesi, kotoma aitapoet, nekinerar Ebaibuli nu. "Imoyonowok ebe epote alosit nejai Edeke lo ainakini, ido awatewok ebongorete apua nu akwap." Konye apaaran adiopet, ne ilelebikinor naiwadikatai, elacakinio imoyonowok kama ejai edeke, abunore alemun etau kosodi etau alemun akuan. Ido apedor na ebuni atajarun oni, ejai toma wok kopani! Ijai kopani oni toma aiboisio nuka akuj. Ijai kopani oni toma apedor na ajarun.

Orai komamei ekisil kanukangun, ti odwe ka adwe luka Edeke ti esubaki kesi akwap kokinga kangina kosodete alosit aijar na ayeiyea kotoma ke. Ijatatar ijo apedor toma kon aiswamaun. Arai ijatater ijo etoribe lo apedor na Edeke toma kon, ijatar ijo apedor aiswamaun. Erai Edeke loka apedori kere .kianyun nu apeleikit eong? Apedor na ejai toma kon kiswamauni. Ipedori ijo alimun akwap ajaun kosodi alosit aijar toma ke. Aleluia!

Ngin nges apedor naejai toma Okanisa kwana, konye ekisil nges eyait. Ido ekisil ngol mam erai nges "Aricit abunget naka ikisil." Erai ekisil loka aiyuun. Abala Yesu, "Epedoros iboro kere mama ejaas ngul lueyongitos." Ido arai kipedori ijo aiyuun ngin, kere nu ingarenikini Edeke ekoni tau aiyuun, ngupongun nukon. Kangini bois naicakete akusi kejen, kotoma aiyuun, einakini Edeke yes. Amen! Erai nakon, irumuni

ijo, Arai ipedori ijo adumun elacet lo engaikini ijo ekisil lo aiyuun. Itei ijo nu apeleikinit eong? Erai apedor ngin na eyait... Arai irai ijo okoku lo Edeke, irai ijo akoku na Edeke, mam ngin ejalakini ijo, Ejai kede ijo kangini sawa. Konye, akoni yuun ngesi enyouni kotoma ke, konye ngesi eroko ejai nepenen, Aleluia!

73 Napekitajaruunor ijo, einakini Edeke ijo aiyuun kanuka anyoun kama ejai amodokok naka akwap. Ipiatori aiyuunikon iboro luka akwap. Inobao aiyuunikon? Aiyuunikon toma aswamisiot naeswama Edeke kotomakon, aitarauun ijo okoku loka Edeke. Kijalak ijo aisabakon, kinyekik ijo akokokon, kinyekik amatakon, naarai ekeu ijo aiyuunikon kuju adepar ngin. Amen. Arai mam ijo kiswamai ngin, imameotor ijo adioyuun. "Ido kanuka aiyuun nges kitajarere ijo, ido ebe kanuka asianut."

Kwape kebunio aiyuunikon alacakinio, itia nen apedor naipedori ijo ajaunor, naarai tomakon nges kiboio apedor asubun akuj ka akwap. Kiboiei Edeke kotoma kon, ido iraasi yesi odwe ka adwe nuka Edeke. Amen! Ikoni nen. Konye erai akoniyuun. Abala Yesu ebe, "Iswamaikinos ijo kwape ejaar akoniyuun. Arai kipedori aiyuun, epedoros iboro kere. Abeit, katemari yes atiar, arai kilimokini emoru lo ebe, oukor kane, ido komam kibuonokin, konye kiyuunite nukilimunit."

74 Aso itunga luka epone loikoni ai ibusakinit ti oni araut, ajaut kede aiyuun ne ejai Kristo elakunan loapolon loiboiei kotomawok? "Ajai kayes aparasia kere, kitoni awasia naka akwap," Ajakut duc naka Ekabukon loepol loaitajario kede apedor na abu obukon kalaije Ocalvary toma okanisa, ajakut na duc naka Edeke loajaran, atiida napolon naelelei, na aponi osenai, na eupasi kaoni korotowok.

75 Abu Israel kotwania auyuun ke. Apotu kocetoros awai naka erot. Kogeunete aimielakin iboro luka akwuan. Korai kesi kosalakinitos kede aiyuun, ido kiyuunitos ebe abeit Edeke aitodol kesi kiton akwap ngin, emamei ti ibore yen itikoni kesi. Apotu odaunitos aicil angolol, apotu da odaunitos abukun atanyia ne ejaasi luka surup kes, apotu ibubuikinitos luka surup kesi kokaukec, ido, iyapikinitos Alomar akwap, konye mam apedorete ajaun kede aiyuun na itolomari kesi kitoni aisumunet.

Yosua kede Kaleb ajatatar kede aiyuun ngin! Apotu kotemasi ebe, "Ipedori oni noi aipikor kanginibore kere yenebwouni koingarenowok.

Ngin ngesi ationis naka ekanisa. Kipedori oni aipikor kanginideka kere. Ejai apedor toma wok. Irai oni odwe kede adwe nuka Edeke, Emamei ibore yen epedori aibwo ngaren wok. Idiophe bore bon, ekoto Ngesi adumun itunganan yen iyuuni ngin, Ngin yen epedori aiyuun ngun nu adau Edeke aismamaikin ngesi. Mam erai ebe iraun; irai da kwana! Ido ejai ajakut naka emoyo loajaran kaoni, Amen! Ikoni nen.

76 Ngun nges apeleikinit eong nakenerar eong akou na akirot atupuruc na, Akipi Nu Duc Ejaas Kaiida. Akipi Nu Duc Ejaas Katiid ejaas ne kwape kwana, Akipi ngun nuejaas duc nuenomuno kotoma Atiida ko Calvary, nuapotu kobongutu Okanisa apaaran nako Pentekosit, Emoyo Lokalaunan ngopengol ejai ne atupuruc. Ido einakinit oni aisumunet!

Ngin nges apolou, alosio eong akonyen naka itunga luedekas, apak naetingikina ngesi eong kangina, eyuunit eong ngin; abala Edeke kwangin! Eipone ngol kismaunonotor aitapoeta; abu Edeke kisumunik! Mam Edeke epedori aingal.

77 Kiyu ngun! Ekoto aiyuun ngin. Akoto korai icebore kanen, apukor aigalisit, apukor ibore ngin kanuka acamakin ijo alomar tomake. Nukupuda oni lolo mere nges ailip apedor ace. Kijaar ijo apedor nailosikina aismamaun akwap nakitetet. Ibore yenipuda ijo nges aiyuun kanu aitwasam apedor ngin. Ibore yenipuda ijo nges aiya aijar ngin, kosodi aijar aijar naka ayongit Edeke, ebe nakilipia ijo idiobore kere, kijeni ijo! Kajaas oni kede atiting mama ejai Edeke kanukangun. Kijeni oni ebe arai kiric oni aicorakineta Ke, mam Nges ingadi imodiobore yenajokan kamawok, karai kilot oni kede Nges. Edeke elosi kede oni. Oo, ikatunga!

78 Ajai ibore idiopet bon yenabeit kesi awam. Asalakinit isipo kotoma ajaatar kesi ibore idiopet bon yenabeit aswam, nges, orot. Mere airim lailo ka laiije; konye asalakinit orot! Ajaatar kesi epir loka akim, loajaatar kesi, kanuka aidarit kesi korot koipoe kalo atupit epir ngol loka akim. Apotu kesi aanyutu ngin kiswama kanejai Musa, ido kajenete kesi ebe arai ngesi engarenon.

Lolo kijaar oni kede Akirot. Itupit oni Akirot. Ido kiseseni oni Akirot kiswamai kama ejaas ikeyuunak, ido kijeni oni ebe erai kwangin, do. Edeke kiswamai kotomawok, kitogogongoori Akirot kede aanyuneta etupanakinete! Kisalit oni kede Akirot. Akirot Nges kitolomuuni araito.

Apotu osalakis kede Musa. Naarai epir loka akim, atupit Musa ngol. Ido apotu kesi kotupakis. Nakegeunatar aibelokin Musa, ogeunete ariangiruanga lailo ka laiije. Kolomuni ationis. Cut.

79 Kisalakininit oni kede Akirot, ido itolomuni Akirot aanyuneta. Abala Yesu ebe, "Etupanakinete aanyuneta nu luyunete Akirot." Itei jo, esalakini kede...Kosalak kede Akirot, kitolomuni Akirot aanyuneta. Konye, Musa kinyo abu ngesi kiswama? Kopotu kiriangiriangaros awai naka erot, ido apotu kotwakiasi eburikec loka akipi.

Kapotu kopaasi awai, ido inyo apotu kesi kiswamata? Apotu kopaasi awai naka esokot, ido apotu kesi kotwakiasi ekecebur loka akipi.

Aomit eong ebe ngun nges eswamau ekanisa lolo. Eriangaros awai naka kana kiwadikaere. Epacaros nejaas iboro lutai. Epacaros awai nejaas iboro ludidik lumam kibusakinit kes aswam. Ikoputu iboro. Ikoputu iboro kwape nat Etal loka ikiyakia. Aibo kidumuna ijo ngin kotoma Obaibuli? Kopotu ikoputu atikasimu na esiomete kesi. Apotu ikoputu idiinin aboisit naka aurio nakiareit. Apotu ikoputu aicokicok aboisit naka aibatisao kotoma akipi, kobongutu toma orot bobo. Obongutu toma...Mam Nges enyounit; eroko ejai ne.

80 kiyangarete yesi etale aboisit naka Kristo. Kiriangaros yesi awai toma anyunyura.

Ebala ediopet ebe, "Eebo, arai eong loka Omethodist."

Ebala loce ebe, "Arai eong loka Obaptist."

Kitodunit ngin ebe mam ijo irai Ekristayot, bodo. Kirai oni luka Krist! Kirai oni luKe.

Ibala ijo ebe, "Eebo, arai, eong, loka Obaptist?"

Arai erai kere nuirai ijo kes ngun, mam bodo ijo irai yenika Kristo, irai ijo loka Obaptist.

Ibala ijo ebe arai eong Epentekotit."

Arai kirai ijo Epentekotit kanuka ediini, kere nuirai ijo nges ngun.

Konye, arai kidumunit ijo ejautene loka Opentekosit! Ido Akivot ngin naka Opentekosit eyangauni ejautene loka Opentekosit! Aitup iboro ngupongun lueswamatos ikiyakia, kidareu kanen kiton nekilelebikinere ijo kede Emoyo Lokalaunan.

Kosodi do arai kidolok ijo apegakin kede Akivot, emoyo loejai tomakon apegakin kede nuebala Akivot, akepolou ebe mam erai Emoyo Lokalaunan. Erai ajokit ejai aituput Emoyo Lokalaunan. kianyu ijo nekidol oni kotoma kangin?

81 Oo, ice kotoma oni apotu kenerata kede angajepa, kapotu kacelanaros ka iboro kangun, kasodete agir iboro luce. Apotu oni ajalakis nginibore kere yenimam ajai toma kanu iwadikaere alomun toma okanisa. Aibodo kidol oni lolo? Ibongo bobo oni amodingot, atukos naewonit. Apotu eswamautu atukos, kasodete atwanier akipi wok. Ngupongun cut abu Pentekosit kiswamau. Nakegeunia araun atukos, abu kogeu anyilinyil eidicane, ido kobala ebe, "Eebo, mam oni kipedori aimorikikin, arai iyuunit ekesa ngol kwangin."

Kolot ngaren, kiboito kede nges kiton nekedolokina nejai Akivot naka Abeit, ajenun Abeit. Nupe eyangaikini ngin kere, ojalak kinyikoko, koipone kangopekangol. Kinyikok, koraas kwape inacan.

Konye, oo, apotu oni eswamautu atukos, kasodete atemar ebe, "Eebo, naarai mam ijo kirai loka Oneness, naarai mam ijo kirai loka Twoness, arai Threeness, arai kwana, mam isio ibuni aimor eidicane kede ijo." Ido nakiswama oni ngun, anyoeka kiswamauni oni? Inyakuni oni awokowate bobo amodingot cut. Erai ngin abeit!

Konye, kiitu ebe, nakeceteror Isirael kinga naka erot, erot loalosi akwap naka aisumunet, mam Atiida abu kinyekik kes; abu kosalakinite nepenen, akipi da kwape kwangin. Aso Emoyo Lokalaunan, esalakinit nepenen. Mam ebeit oni airiingar kau.

82 Kwana, kane kisisianakini Edeke oni ibore yenepol. Kisisianakini Edeke oni kane akiro. Aponi Kristo kosenoi kirwanatipet, koinakini oni ejautene loka Opentekosit, apak adiopet, kanuka kakere. Kwana, nakesenere Atiida ngin, mam bobo abeit ngin ainyoikin asenio bobo. Aponi bon kosenoi kirwanatipet.

Abu Musa kiswamau aibucaret kanu ainom kirwan nakiareit, aitodiar anonok naka aiyuunike toma alucet. Konye nakenomere Kristo kirwanatipet, kijeni oni ebe mam Nges ebeit ainomio bobo. Eebo kinyobo eswamai Musa? Ajai Musa asipokin icebore yenitetet, aitam aiswamaun ibore yenitetet.

koipone kangol keswamata ingarenokowok luka ediini lolo. Atamata kesi aiswamaun icebore yenitetet. "Ibuni isio ataraun akosiwate Atukos naka Edeke. Kibuni isio ataraun akosiwate Ekanisa loka Pentekosit loka Edeke. Ibuni isio ataraun akosiwate Atukos naimorimorit. Ibuni isio aitaraun akosiwate nu, ngun arai kwa." Mam erai ngun abu Edeke kiswama. Mam ngin arai aomisiotiKe.

83 Aponi Kristo kinomai kirwanatipet. Ngin nges erai ejautene lomojong. Ngol nges erot lomojong. Kotoma apaaran naka Pentekosit, abu Petero kotima ebe, "Kitoronokinos ngidiopet kayesi, kibatisaunos Kokiror loka Yesu Kristo."

Icokicoki oni kokiror loka Papa, Okoku, Emoyo lokalaunan, kainakinete iponesio kere luka inonosio ka

iceboro kere luikamanara kede ngin." Kicetor oni awai kanejai Akirot, komam abunikin amamei nekidoli oni. Kiany?

84 Kisisianakini Edeke oni akiro. Mam abeit Musa atemar ebe, "Kwana kitegeari oni ibore yenitetet kane kwana, ido ibuni oni aiswamaun atukos ido ibuni oni aiswamaun Ekanisa loka Katolik." Ngin nges ibore yenisodit yenapotu kesi kiswamata. Mam, ido akaulo apak edit, "Eebo kibuni isio aitegear ibore yenitet kama ejai ngin, kibuni isio aiswamaun Lutheran." Kotupakinete do luka Anglican, kosodi do Baptisat, kosodi ali bobo ice, ka campbellites, ka Ekanisa loka Kristo, ka loka asurup lo ka Kristo, ka iboro luce kere. Itei jo, kere apotu kogeutu anyoun, ediopet akaulo na loce, ediopet akaulo na aloce, kiswamaununete idiinin ka atukosia. Mam abeit kwangin. Koany kanen ibore yenejaas kesi aswam? Ejaas kesi ainom Atiida bobo, aitegear ibore yenitetet. Mam oni kipuda aisisianakin naitetet.

85 Kanginitunanan Obaibuli kibatisatai Kokiror loka Yesu Kristo. Kanginitunganan Obaibuli loabu kodum Emoyo Lokalaunan, abu kobu korot loka Edeke, cut koipone loabu Edeke kitodiara ngin ajaut. Kapotu kiswamata ibore ngipengin. Ajaatar kede ejautene ngopengol. Atupanakinete aanyuneta ngupongun kes. Aswamasio ngupongun atupanakinete kes. Kanukinyo? Ajarere kesi kanuka Atiida. Ajaas kesi kede Akipi ngupengun.

Ido, lolo, ibore einakinit oni kijaas kede italesio ka idiinin, erai naarai ijai oni ageun ibore yenitet. Mam oni kipuda idiobore yenitet. Kobongosi kau!

Mam abeit Musa ainom Atiida bobo, aitegear ibore yenitetet. Abeit nges ainerakin kes, nuikamunitos Atiida nasodit. Oo, amuno eong ebe ikamuni ijo ngin! Abeit Musa einer nugeunete, Atiida naenomitai; mere aitamit ainom ngin bobo, mere atamit ageun ibore yenitetet, konye einer mama ejai ibote yenimojong.

86 Edeke, ingarakinai eong! Arai atwana eong arai loican noi, kotoma olutaari, abuni eong einer nuikamunitos Atiida namojong! Abuni eong einer nuikamunitos aijen nasodit. Abuni einer nuikamunitos nuiwadikaere numojong nuapotu koinakis kes aibatisao naka Emoyo Lokalaunan, "Kitoronokinos, kanginidiopet kayesi ido kibatisai Kokiroro loka Yesu Kristo kanuka aisionio naka adiaakanaretakus, ido kidumunete ainakinet naka Emoyo Lokalaunan." Akipi nuejaas duc koleleete katiida eroko ejaas kede oni. Kitolomuuni ibore ngipengin. Itolomuuni aitapoeta. Kitolomun aitangal. Kitolomuuni aidwar. Kitolomuuni nginibore kere yenapotu kesi kiswamatos.

87 Nakebongora Isirael aibwo kede nuiwadikaere bobo, kosodete abongokin bobo orot, apotu kolototo kiton akwap naka aisumunete. Konye abu koyangaik kesi ikar akaisaongon.

Abu Pentekosit koyangaik ikar akaisaongon arai akaisakany irimete kotoma amodingot. Obongutu mama ejai Atiida! Ajai kidelelei. Ena kane, iwadikatai cut ne toma Akirot. Ejai Emoyo Lokalaunan ne iswamai iboro ngupongul lukolo eswamai, aso ejaas Akipi nuejaananas duc ne. obongutu abongun mamake, obongutu nejai nakolo, namojong.

88 Koipone bo ali ajaar kotoma kanu mojong?

"Eebo, kesi apotu kijangijangata akanin kede ekalimonokinan"? Emamei ibore kaanat kangin. "Kesi aponi kibatisai Kokiror loka Papa, Okoku, Emoyo Lokalaunan"? Emamei ibore kaangin. Emamei itunganan Obaibuli, kamace kere, arai (kinga naka ikar akwatauni) kokinga naka Ebaibuli, yenebatisatere kotoma okiror loka "Papa, Okoku, Emoyo Lokalaunan." erai ngol etale loka Okatolik, mere aisisianakin naka Ebaibuli. Kiany?

89 Kajaatar kesi Emoyo Lokalaunan. Etupanakinete aanyuneta nu luyunete. Ebuni aswam bobo lolo. Eroko Atiida ejari kwape sek kajaria, Atiida ngin nainomitai!

Enyekikis atemar ebe, "Eebo, kwana obua ber olom okanisa kosi, olom toma adoketait kosi naka Pentekosit." Mam, obua maa ijo olom Baptist, arai Methodist arai Presbyterian, arai Katolik." Inyobo ngin? Erai ngin ainom Atiida bobo, atamit ageun ibore yenitetet.

Kolimok kes, "Kitoronokinos, ido kibatisaunos Kokiror loka Yesu Kristo," kanuka aisionio naka adiaakanaretakec, "ido etupanakinete aanyuneta nu luyunete." Kwana ibongu do ijo orot, ibongu do ijo Akipi ngupongun. Akipi ngupongun apote ainakin ijo aisiteteunio ngipengin. Ebuni ainakin ijo aigwerio ngipengin mama ejai akuan. Ebuni ainakin apedor ngipengin naitalauni. Ebuni ainakin apedor ngipengin naitangali. Abuni aswam ibore ngipengin yeneswamat kolo, arai bon apedorete oni abongor nejai Emoyo Lokalaunan ngopengol.

90 Aijar naejai toma omusabibu itolomuuni araito. Arai abu kitolom okaru loatubor, kitolomuuni ibore ngipengin okaru lo. Ngol nes ekisil loka Edeke. Ekisil loka Edeke nges ebe, arai erai lo emusabibu, ojalak ijo nges elopet, itolomuuni araito. Ipedori ijo airop nges kede icebore, konye ojalak ber ijo nges bon ido ebonguni kiton araun emusabibu bobo.



Aso irop oni ekananisa kede Epetekotene, kede Ebatisayone, kede Emethodiyone, kede epresbyteriane, kede-kede Eanglicayone, ka ediopone kere lo iriongeta. Kanukinyo mam ijo ijalakina ngesi bon? Kobongu Omusabibu, ebonguni apedor ngipengin. Amen! Amen! Amina eong ngin.

91 "Ategear icebore yenitetet." Ibore ngipengin kiswamau oni. Mam kitamakini aitodiar apedoritiwok. "Epirotit mutan nges ageuni ibore mutan yenapolon ekanisa loamutan ka mutan ka mutan." Mam arai nges ngin.

Ngun kesi abu Musa olim, "Ketodikini eong kesi nu apedori eong aswam. Ayangauni eong nges kodiopone kere!" Abu kinom ngesi, mam apotu kopotu. Kosodi acelar bobo, Kitodia nu apedori eong aswam!" Abu Edeke kiswamanar kede ngesi kanukangun.

Mam iomit ebe, arai "Kidongakin ijo mama ejai ecediini." Kiswamanaros Edeke kede ijo kanukangun. Erai ngin cut naka abeit. Ekoto ijo abongun nejai ngin namojong. Kobong kau.

92 Kinerakinos ijo bon kede itunga. (Mam ilimokini kes ebe, "Obua kolom okanisa kosi. Kobua ijo iner ikosi italesio.") "Kobong kitoronokin, ido kibatisaun Kokiror loka Yesu Kristo, kanuka aisionio naka adiaakanaretakus; ido kidumunete ainakinet naka Emoyo Lokalaunan, arai edolit ekonetau. Ido etupanakinete aanyuneta nu luyunete. Atukos naka iyuunak, eupakinos aanyuneta nu kede kes." Naarai kanikiinyo? Atiida, Atiida nainomitai kede Akipi ke nuka ajar eponitos cut atupakin, iswamai iboro ngupongul lueswamat kokau kangina. Emameete nuepedori aswam. Oo, eebo.

Ikoto oni aitodianar, kasodete atemar, "Irai isio Methodist, ka Baptist."

93 kinerak Atiida ainerakin, ejai Ngesi duc. Mam itamakini Alomar abu eong "aloma" kokwap kane. Mam itamakini alomar. Mam ijo kipedori alomar Ne, erai ngin ibore ice cut. Ipedori ijo alomari okanisa loka Methodist, ilomari ijo Baptist, kipedori ijo alomari Pentekooti, kipedori ijo alomar toma Anglicans, konye mam ijo kipedori alomar Ne. Mam. Ejai ijo aibatisaikin toma Kana. Mam ilomari toma kangin; kilelebun kede ngin. Nges ngun kere. Erai ailelebun kede inyo? Alelebun kede apedori, ailelebun kede Emoyo, ailelebun kede ajar, ailelebun kede aiyalama, ainapakin, aingirinit, aiyapepear, ajokis, apedori naka Emoyo Lokalaunan kotoma ajarakon, naarai ejai Ajakut ne namam edaun. Kiitu.

Agolok eong naarai aeka esawa.

94 Konye, kiitu ebe, mam Atiida ngin abu kojalak kes. Mam cut abu kojalak kes. Ido mam Kristo ebuni ajalakin oni; abala Kristo ebe, "Abuni Eong ajaut kayes apaarasia kere, kiton osangeta luka akwap." Ngin erai naka abeit? Ido abu Atiida kosalak kede kes erot kere anyoun Kokoreb kiton Nebo. Abu kosalakinite. Kiton Yorodan, aroko ajai. O Edeke, akoto eong aanyun ngin ko Yorodan!

Musa, nakejaar ngesi Yorodan, ajai Atiida kede nges erot kere angetar. Ido abwoi ngesi kokwap kangina, koseseni kwap nejai a-atukos naka itunga luebirora kosodete anyoun awai kama ejai Edeke. Akurungani etauke kanukec. Kosodi kiteluo owai loka Yorodan. Kangina ajai ngesi Yorodan. Enera eong, nuikamunitos Yorodan naka Omoyo. Ido abwoi ngesi kangina, kojai atwanare adolokin osiepike. Konye abu ngesi koany, kosiepike ajai Atiida eperi Kanen. Kosodi ngesi aikunyakini adokar toma Atiida, kosodete imalaikan kopotu kodakasi nges.

95 Mam eong abuni aitukuroori ijo karaida aijal ijo." Mamace arai etiokoto apaarasia biai, arai imojongi oni biai, arai kitwaki oni atwanare naepone ali, kiitu ebe, ebuni Atiida ajaun ngina Yorodan. Mam eong ebuni aitukuroor ijo karaida aijal. Kiitu ngin. Akipi nuejaas duc Atiida epote ajaut kaoni apaarasia kere nuka ajar, ido karaida kiton Yorodan.

96 Ketuluroto akwesiwok. [Kijaikini Onac kotoma atukos adwaraanut-Ekewa.]

Napekeroko Emoyo Lokalaunan ngol elosi Akidingosiwok, Emoyo loka Edeke elosi akidingosiwok, aticepak ojaas ice ne atupuruc na lumam ejenete Kristo, ido mam ijo-mam ijo kiyapikinit Atiida ngin, mam ijo kinerunitos kede Nges atupuruc na? konye ijeni ijo ebe ejai ngin ne. Asesen ngin kiswamai kanginiboisit kere, asesen Nges irimirimi ne, asesen ngin elosi kotunga. Akipi ngun nuejaas duc. Erai ngin aitajario. Ngol nges Emoy loilelebi ikoponocek kiton nemam epedoriata atitingikin bobo, ejai icebore abunore ngaren. Ido komam ijo ijeni Nges, ijo kipuda aikeun akanikon kosodi atemar, "Ilipakinai eong, Onac Branham. Akoto kwana eong ajenunu Nges, ido akot eong ajenun Nges kotoma aileleba naka EmoyoKe. Akoto eong ajenun ebe ejai Ngesi osiepike, isawan kere. Eyuunit eong ebe, ejai Ngesi. Konye akoto eong ainerun. Ido ejakit eong akure, ido eyarit eong etengei kanuka Edeke. Akoto eong ajenun Nges ejok?"

97 kisirereng Edeki ijo, loapolon. Ido kisirereng Edeke ijo, loapolon. Ka ijo, Onac. Ijo eebo, kau cut laiije. Kwap lailo, amucalat, eebo. Kiseseni isio akaninikon, ido eseseni Edeke da kes. Kisirereng Edeke ijo, etelepat. Kisirereng Edeke ijo. Ka ijo, amucaalat. Amen. Kisirereng Edeke ijo. Kisirereng ijo, inac. Icetunganan bobo kwana, kotoma apak naka aililing. Kisirereng Edeke ijo, okau kangina ekesa lodidi.

Koomoo nuikamunitos ngin. Koomoom ajakut duc naka Akip Katiida, Emoyo ngopengol; loabu Ngesi

komonyia kangina apaaran naka etube kanuKeng, neabu Ngesi koyangara etubewok. Kosodi ebela loka Edeke loka anyunyura aisen Nges, kosodete awokotoKe ka akipi abulun kinga kamaKeng. Kotema Ngesi ebe, "Papa, akaninikon nges ebwaikini Eong Ekamoyo." Ido kotoma apaaran kangin naka Opentekosit, abu kobu aupakin kede oni anatar erot. Ido eyapie kwana.

98 Neabu ijo kolomara kinga kosodi anyoun awai ore; "Ejakait ajai eong abunore ore. " Kwape kiyeyia ekosio lo, arai kipuda ijo abunore lailo olutaari kosodi ainakin bobo, naka ekonimoyo mama ejai Kristo? Amen.

[Kinyikokini Onac Branham ayoere kede eporoto kalo edit, Ejakait ajai eong abongun ore-Ekewa.]

Konyounete isap iarei ludidik alosit ngaren, katipet, ka akiyo akonyenekec, kokukokinos kwap kosiep naka elutaari. Naarai, itimitai kes. Kaponi kitimo kesi eroko ejalakin icolongoikec, napeketutubotor kesi kotoma aomisikoec. Apotu kopotu ngaren kosodete akukokin kwap ne, ainakin itunga ajenun ngun, kowai kangai ejaas kesi toma, kotoma atupuruc kana.

99 Ti eong aomit ebe ejaas icetunga luka apolok luekotosi aiswamaun nu, akukokin kwap, kosodi atemar ebe, "Ejakait, abu-abu eong apaa nelwana noi korot, ajaun eong kede abunonokin naepol, ace pakio abu eong apaa kiton Alomar adiakar. Kwana epuda-epuda eong abongun eroko apak etuboro. Edeke, epuda-epuda eong abongun. Epuda eong cut abongun kasodi akukokin kwap." Amen.

100 Kwana, apotu ipesur ke Aurther Beam iuni ludidik, lueriakasi nepetai, kopotu nee kosodete akukokin kwap.

Na ejai abunore ngaren erai ipesi yenididi naejaatar onaceke yenididi ore yen eroko erai imukeru. Ajai eong eboie kapaaran kaya; kobuni ejakait Wood kosodi alimokin eong, ebala ebe ajai inac na alosit adekis kanuka aidoun ikoku. Abu Emoyo Lokalaunan kotema ebe, "kolot kolimok kes ebe, ebuni araun itelepat." Nakeurunere, arai itelepat yenididi.

Esubit do bala atupuruc naa erai idwe, idwe ludidik luelomunitos atukot inac Arnold, ajaasi aititing aijarakec. Elutaari kere, teten ka, idwe ludidik bon ileleba.

Ti ejok korai ti ooni kere luolutaari awoikin ekosio, mama ejaas itunga luce kere luapolok, (mam ti ejok?).

Ejakit kwana abunit eong ore.

101

Abunore ore...?...

Komam bobo airia cut;

Ongaa akaniniKon nu amin,

Ejakait, ajai kwana eong abunore ore.

102 Keluroto awok kwes apak edit kelipa, kanu idwe ludidik luu.

Papa lokotoma Akuj, arai ejai moi naebuni, arai eyangaiki Yesu ikaru Itomon arai Itomon ka lukany mam ebongunit, araunos lu isap ka apesur nu epote ayangaar aisiraret naa nejaasi aturio ace nuepote. Emamei eong abuokin cut, Ejakait, konye kotoma apaarasia kere nuka aijarakec eitunete kesi ebe aponitotor olutaari lo. Ido eraas kesi luketiai loepol, Ejakait. Etubokina ikecetaun ludidik iliogototas atupuruc na. Mam ber kiiraritos Aisiraret da kere; alomunete kotogo kwape kwana, kotoma airar inac Arnold kinera; kopote ne airimor elutaari kere, aijaikin akecejjar mama ija Ijo.

Kwana, Papa, adau eong kotoma oiner alimun ebe, iboie Emoyo lokalaunan kotoma kosi. Ido Emoyo lo Lokalaunan, kede aiyuun, kiswamai Emoyo lo iboro kere. Ido eyuunit eong ebe esawa lopelo, itimi ijo imodiobore yeniswamatos kesi. Ido elipit eong Ijo kede aiyuun kere naejai otauka, ebe ibuni Ijo aidar aijarakec nadidi angetar erot kere. Siri kes kipacaros awai kotoma erot.

103 Abeit, erai teni yen ibore yenitegelikina. Abala Emoyo atupuruc na ebe, ibuni isio aanyun "Icebore yenitegelikina." Edeke, arai kijalakit ijo aiswamaun kede luce, koyanga do idwe ludidik. Eipone loeraar ebe atupuruc na, kotoma anyarario naka olutaari, emamei idiopet da yenapolon, konye atukos kere naka idwe nges abu kobu ngaren. Konye korai aisiraret napoleon naetiono amisiikin, kiton nejaas lukapolok, konye idwe nges apotu ikamutu Emoyo kotomake. Kisiyalamikini isio Ijo kanukec, Papa. Ainakini eong kes mamakon, kwape ebulesitikon, kwape abokoi nuka airiamun kana; kanuka, aitununa ebe Akipi nuejaas duc nuka ajar epote alelee duc kede kes bon ebe ejarete kesi. Kojaunos kesi kede aiyuun kotoma kanu kiswamasi kwape kwana, ebe Edeke Loabu kiriu kes kotoma ocolongoi kosodi aijukun kes ngaren ne, kojaunos kesi kede aiyuun mama ejai Edeke ngol apaarasia kere nuka aijarakec. Obongutu ikecemoyon mamakon kotoma apaaran naka atwanare; kosodete ainyakun kes toma awatekec kotoma apaaran naka ajarun. Erasi kesi lukon, Papa. Kijaikini isio Ijo kes kanuka Ekiror loka Yesu.

104 Ketuluritos akwesiwok kwap. Alosi eong ailip idwe ludidik lu kolutaari, luyiunits ebe Yesu Kristo Nges etajaranikus ido Nges abu kolimok ijo, kokau kangina atukos abunore kosodi akukokin ne olutaari. Iyuunit

ijo ebe emina ijo Yesu ido itimi adiakaretakon kere? Akoto eong yes kere anyoun aibwo kosodete asesen kau lailo nejai atukos. Yesi kere isap ka ipesur ludidik luiminas Yesu, onyoutu kosesenata kau mama ejai atukos ngina, nginidiopet kayesi.

105 Dobodo yes ipesur ludidik luijaas ngaren ne? Kiyuunitos yesi? Iminasi yesi Yesu? Ipesur luu ludidik kane, iminasi yesi Yesu kede itaunokus kere? Iminasi yesi? Iminas yesi Nges? Iminas yesi Nges, awiinyi? Kobwata kane, ojenutu itunga ebe iminasi yesi Yesu. Kisirereng Edeke yes.

Kwana, ebelokinos lailo ayeikisi itunga luu eroko oni enyouna kane, "Emina Yesu! Ajeni eong naa. Elimokit eong Ebaibuli kwangin." Kiany? Ikeutu akaniniwok kuju kwape kiyeikina kwana. Eebo, ayeikisi.

Emina eong Yesu! Ajeni eong naa,  
Naarai kalimokinit eong Ebaibuli kwangin;  
Eraasi ludidik lukeng,  
Ekalanyaka kesi...

Kwana kede akusikanin eriora kuju, idi kane ekotosi-ekotosi ajaun ngina?

Eebo, emina eong Yesu,  
Eebo, emina eong Yesu,  
Eebo, emina eong Yesu,  
Elimokinit eong Ebaibuli.

106 Kwana yesi kere olimutu akaulo ka: [Idwe luejaas olutaari olimutu akaulo ke Onac Branham-Ekewa.] Eyuunit eong ebe erai Yesu Kristo Okoku loka Edeke. Lolo acamuni eong nges kwape ekatajaran. Ageun lolo, kiton apaarasia kere, abuni eong amina Nges ka aijanakin Nges. Amina.

107 [Olimuni Onac kotoma atukos ebe, "Onac Branham, kijaar eong idwe iwongon kwapekwana otau ka. Ijo ipedori ailipakin kes?"] Eebo apedori eong Onac Ben.

Papa lokotoma Akuj, eseseni etunganan idwe ice ludidik epote nejai Kristo, ido emonyi ngesi, kwape papa, kanuka ikedwe obe. Ido lo abu oyangau ludidik luu olutaari, Itajar Emoyo ngopengol ikedwe, Ejakait. Koinaik nges ekeipud. Kiinakini isio kes mamakon, Papa, Kokiror loka Yesu Kristo.

108 Kwana kwape kibongoriata yesi aboisio kus idwe ludidik, akoto eong nginitunganan kere yen iboie okoro kangol ayogan idwe ludidik luu, arai atiror ipurianakec kwape kebongoriata. Kobongosi yesi kere aboisiokus, lailoo. Ido nginitunganan kere atiror ikesa ludidik luu ipurian. Ido kimina isio yes kede ikositauon kere. Ido iraasi yesi atutubet naka akuan naka Kristo, noi kwape kasio da luce kere.

Kijai oni alosit Zion,  
Zion, Zion naibus;  
Ijai oni alosit Kiton Zion,  
Eibuga ngol loibus loka Edeke.  
Kopotu oni luimina Ejakait,  
Ido kojenuun aiyalamawok,  
Kemorikikinos nepepe okosio loejjim  
Kemorikikinos nepepe okosio loejjim,  
Kemorikikinos nepepe okosio loijjim  
Kasodete konyet alukun ecolong  
Kasodete konyet alukun...

Erai ngin ayoere naegogong najokan! Kwana ekeutu akaniniwok.

Ijai oni alosit Zion,  
Zion, Zion naibus;  
Ijai oni alosit kiton Zion,  
Eibuga ngol loibus loka Edeke.

Kwana eyoganakinos idiopet ka yenice kwape kiwoio.

Ijai oni alosit Zion,  
Zion, Zion naibus;  
Ijai oni alosit kiton Zion,  
Eibuga ngol loibus loka Edeke.

109 Kwana abwoata ketuluritos akwesiwok kwap, kwape ki...obwoliaik ngin Onac Teddy, bon a...[Ogeuni Onac Branham ayoere motimot, kijai oni alosit Zion-Ekewa.]

Ajaatatar eong icepudesia nee, ka itaabalan kaiceda. Aticepak eponitos kokinga. Alimonokini eong Billy ebe ajaatar isokosin lu ikoku kayenididi kophonitos ko England, owojak kwangin, engwalit ikoku ngin yenididi. Aso abeit oni ailip kanukangun, da.

110 Ido kwangin...[Kotoma atukos, kotemari Onac Ben ebe, "Onac Branham, kitimoi ber ijo eong kanuka asomakin einer, konye kilip ebe, yenabu ibir emotoka kosi akuar ya, arapet naka aliirro, Ilip tetere

epukorio.] Amen, Onac Ben abuni eong aswam ngun cut.

[Inyikokini Onac Branham aiye ekosio, Ijai ooni alosit Zion]

111 Kwape kilosio, Ejakait, ijeni sio ebe atiida naponi inomai eupasi kede isio orot, ajakut duc naka akipi nuelomunete atiida eupasi duc kede ekanisa. O Edeke lomam edaun, olacakinai sio, atupuruc naa, aiyuun Edeke lo loejai kede sio. Ajeni eong ebe ibuni ijo aiswamaun ngun, kwape ipedora adumun asianut kamaakon, tetere ipedori ijo amunokinor isio ngin. Korai ti kopedori ijo ainakin sio kotoma abaraara, aticepak ipedori aitaswam erono, Ejakait. Konye arai kidum asianut kamaakon, iswamaun.

Abu Onacewok olimunite ebe abu icetunganan ibir ekemotoka. O Ejakait, ijeni isio ebe emameotor etunganan lo kede isirigin lu aswam iboro luu. Elipi eong ijo itepesen etau itunganan kangin, arai bonat kecepone, tetere itoronikin kanu aswam nuu, kosodi abunore, atemar ebe, "Onac, eong abu keswamaun ngun, etemokini eong ekonimotoka." Ingarak Onac Ben kede luminan ke kere.

112 Akanika nee ejaasi itabalan kede ipudesia, ejaasi kede aiyuun mama ejai Edeke Ngol. Ajaatar Musa kede aiyuun mama ejai Edeke Ngol, Ido abu kotub Angolol, Ajaatar Daniel aiyuun mama ejai Edeke Ngol, ido aponi kitolomunai ngesi kinga na abwa naingatunyo, Ajaatar Shadrak, Mesaki kede Abenenego aiyuun mama ejai Ngesi, kosodi aitudeng akim. Ipaulo ajaatar kede aiyuun mama ejai Ngesi, ido adiope paaran nationor aimor noi komam Paulo kepedori adolokin itunga kere, abu ngesi olem itabalan, otemari ebe, "Eyuunit eong ebe ejai edeke kede eong." Abu kidokok akaninike kotabalan kede aleeson ido konyounete imoyon luajokin kotunga, kosodete ariebosia kede adekesia anyoun kamaakec. Ido, Edeke, Ajaatatar eong da kede aiyuun mama ejai Edeke Ngopengol. Konyoutu ajokin. Ejakait, Ariebosia, adekesia, aticaneta, konyoutu.

113 Ijo ngesi Edeke Ngopengol loabu kinerakinos keong kangina kotoma opir loakim, kangina Kocilet. Ijo lope ejai aputokon ikaja kane, arwatat. Ijai ijo kasio, Ejakait, Ijaenena ijo duc, Epir loakim ngopengol. Ido kinumunum akipi nuka tiida kanginipaaran, kwape kimoria Komoyo. Aso, ijai ijo nee. Ejakait, imunokina isio ijo. Ijai isio kede aiyuun nekon. Iyuunit isio ebe inyonyoikini ijo isio kede aingarakin isio. Mam erai kanuka aibuses kosi, Ejakait; ti do kiraun bala Musa kolojet, nekeswamaa ibore yenaronon. Ejakait, ikoto isio aswam icebore kanu aingarakin ijo. Ngin nges apeleikinet naka ekositau, aingarakin ijo, arai kipedori aiswamaun ngun. Kitodikinai isio, Papa, nuikoto ijo aswam kere.

114 Ido kwana, toma aswamisiot nakaiyuun, atubokini eong adeka naegwoikinitos itabalan lu, ka ipudesia lu. Enyounete ajalakin itunga. Ejakait, eyuunit eong ngin kotauka ebe iswamauni ijo ngin. Eyuunit eong ngin, kotauka, ebe iswamauni ijo ngin. Itangaleu kanginideka kere kakidingos kosi atupuruc naa.

Itajar ngul luapotu kikeutu akecekanin, luapotu kotemasi ebe ekotosi abunore atiida, adumun akipi. Edeke, ojak kesi akure lolo, ojaun ajar naekonyit abalang mama kec, kitoni ne ejakia kesi akure kanuka Kristo. Oinak.

Ojaunos kede isio akuar naa, Papa. O Edeke, oinak eong amisiik, kotoma kopudesia kalu, Ibore yen ejai Otauon itunga. Arai emamei ibore yen ejai otauonokec, Ejakait, oinak do eong ibore yen alimonokini eong ikecetaoun akuar naa.

115 Isirereng onacekosi Neville, kede akeberu, ekaleke; Ekanisa kosi lodidi loo, lumunon kosi, Idikonin kosi, Imeeban kosi. Kede akuankon aboisio kere, ojaunos kede isio, Papa. Kititingikini nuu akaninikon, Kokiror loka Yesu Kristo.

Zion; ijai alosit kuju Zion,  
Ere lokalaunan loka Edeke.

Kwana ayeikisi do, cut, kodoco nejai Ngesi kwana. Itei ijo?  
Kapotu, ooni luimina Ejakait,  
Ketejenutu awok aiyalama,  
Kemorikikinos okosio loawiwinyan,  
Kemorikikinos okosio loawiwinyan,  
Ido kalukutu eicolong,  
Ido kalukutu eicolong;

Kwana, kede iwokotauon ituluritai.  
Ijai alosit Zion,  
Zion nalaunan, nalaunan;  
Ijai alosit kuju Zion,  
Ere lokalaunan loka Edeke.



[www.messagehub.info](http://www.messagehub.info)

Nuelimonokinit

**William Marrion Branham**

"... toma apaarasia nuka eporoto..." Apuk. 10:7